

Gelixrdo Sul Vaexr Beil Ber

1

Ca Leil Zzasoso Dae Biex

¹⁻² Ngo mel Barloxr a. Arbosobo yar xiar dae mel dax zox dae a, ngo leil tiur teixl lei a, Yisu Zidu miardal dae ca ddei bei a. Gelixrdo zzi gga Arbosobo ddei jiaxlhuixl gga ca mel, ngo nei niul ddei arzzi-nimar Sortixrnixr ngua nnel nia leil xil vaexr gger. Nia mel hherdder Yisu Zidu dax cir piar a bei a seirceix-seirmaer loxr ho ca mel nga a; halae Arbosobo nia leil yar ddei cassor-worssor bei lol. Arbosobo cirmaex-hanga Seirpor Yisu Zidu leil ddarzzi su mel leil tiur a niul dax ciryoxr a nga lol. Zidu mel yaa ddei Seirpor nei niul ddei Seirpor a.

³ Niul ddei Arbbor Arbosobo nei Seirpor Yisu Zidu nia leil cirza-hanga seirseir meixl gger lol nia, nia leil nixmox zzaso lol nia.

Arbosobo Leil Nawo

⁴ Arbosobo mel nia leil Yisu Zidu dax cir piar a bei lol a nia leil cirza-hanga seirseir meixl gger, yel ngo arddolcar lei nia leil Arbosobo leil nawo gger. ⁵ Halae nia Yisu Zidu dax hher ji dae a, Arbosobo nia leil yar ddei ddar mel saexl lol, ca leil biar gger bbesur zza lol, cirza-hanga lei zza lol. ⁶ Eine nga a mel nia dder ngua nia leil biar gger dae Zidu ddei ddar seirseir mel yarzi a saexl ddo a. ⁷ Yel nia ggegge-sese arla Seirpor Yisu Zidu jjixr lei nixixl ddei leil xia dae car, Arbosobo nia leil cirza-hanga lei bei bbesur zza lol. ⁸ Yar nia leil yar leil ddarzzi doxr dae lol var, yel Seirpor Yisu Zidu jjixr lei hal cir ni ci a nia leil botaddu lei nr zza lol. ⁹ Arbosobo mel yarzi ddarzziddo, yar bbeix ci mel dder bei ci. Yar mel nia leil tiur teixl lei a yar ddei Ssor, hherdder niul ddei Seirpor

Yisu Zidu dax hher ji dae lol.

Jiaxlhuixl Gga Ca Mel Zzidax Zex Nr Ddo

¹⁰⁻¹¹ Arzzi-nimar arzzi-nimo mel, Gelaexr mi ca hal hhexr ake gga lei ca mel ngo leil biar gger a bbeix, nia zzi dax zex doxr. Yel ngo Seirpor Yisu Zidu ddei quexrlxl ddei leil ngol dae a, nia leil quex, nia zzicarzzi dax toltor a bei nia. Eine nga a mel nia zzi dax bbe kae nr var, halae nixmox zzar ciryoxxr a xiar. ¹² Ngo ddei yilsi mel dder bbeix: Nia ca cirmemel a zzael bbeix: “Ngo mel Barloxxr dax bei mae dae su a.” Cirmemel a zzael bbeix: “Ngo mel Yalboloxr dax bei mae dae su a.” Cirmemel a zzael bbeix: “Ngo mel Birdaexr dax bei mae dae su a.” Halae cirmemel a zzael bbeix: “Ngo mel Zidu dax bei mae dae su a,” eine bbeix.

¹³ Holbbaexl nia Zidu leil zae nr cir sael bbe mal gger cexr a ngo? Nia leil weix a sixrzixljiaxl leil diexr zil su ddei mel ngo Barloxxr nr nga zzarmar? Nia mel ngo ddei mi ddei bbeix dae a sexlsir nr nga zzarmar? ¹⁴ Ngo Arbosobo leil nawo, nia dax halmaex gga mel ngo Zililsibuxl nei Gieyoxxr leil lar sexlsir gger goxr. ¹⁵ Nr nga a, si halae bbeix, nia ngo ddei mi ddei bbeix dae a sexlsir a eine bbeix lei. ¹⁶ Kebal nael ngo halae Sitixrfaxr hhexr leil lei sexlsir gger goxr a. Yaa leil cuxrteixl a nael, zeixleixr arseir leil sexlsir gger goxrgoxr a ngo lei hol-nr-cir a. ¹⁷ Zidu ngo leil miardal a nia dax lei lol a mel, nia leil sexlsir gger lei lol nr nga, Yisu Zidu leil biar dae ddar seirseir mel biar gger lei lol arddeir a. Ngo nia leil Zidu sixrzixljiaxl leil si a biar gger car, olnolddu ddar mel nr sser. Ngo olnolddu ddar mel sser arddeirnga a mel, ca mel Yisu leil ddarzzi a mel Yisu sixrzixljiaxl leil ddoddomo bei a ddarzzi nr nga, ngo biar dae olnolddu ddar mel leil noni a nga arddeir a.

Arbosobo Yarzi Ddo Nei Yarzi Olnolddu

¹⁸ Zidu sixrzixljiaxl leil si biar dae ddar eil mel, cirse-cirsil lei Arbosobo

dax bbe kae ca hal mel i dae a yarzi medeil. Nael niul leil mel jiuxl wo ho a, niul dax bbeix ci a mel, eil ddei mel dder Arbosobo ddoddomo bei dae ddei nga a. ¹⁹ Hherdder Arbosobo Ddei Sul ber leil vaexr dae mel sael a nga, bbeix:

“Armael zzir dae a olnol yarzi ddu su ca mel ngo yaa leil baexr a
olnolddu lol nia,
armael zzir dae a yarzi jilixr su ca mel ngo yaa leil baexr a jilixr lol
nia.”^a

eine bbeix a.

²⁰ Halmel, olnolddu su ca mel azo suax bbeixleir? Arbosobo ddei sulsaxlsu ca mel azo suax bbeixleir? Middurbbor ddar bbeix birvul su ca mel yoxl azo suax bbeixleir? Nr nga Arbosobo doxl middurbbor olnolddu su mel leil medeil loxr lol a zzarmar? ²¹ Arbosobo mel yarzi olnolddu, yel yar xiar har ho a mer woxrke ca mel armael saexl dae mel leil koxl dae a mel Arbosobo leil saexl nr var. Doxgoxleixr arseir niul biar dae mel leil ddarzzi a mel Arbosobo yaa leil jiuxl. Niul biar dae mel Yisu leil ddar-nr-zzi su ca mel zzir dae a yarzi medeil. ²² Bir dae a bbeix, Yoxrtaexl su ca mel nael Arbosobo ddoddomo bei dae hal mel i niazzir; Yoxrtaexl su nr nga ca mel nael olnolddu niazzir. ²³ Nael niul zzael Zidu sixrzixljiaxl leil diexr ngexl eil mel ca leil biar gger ssi. Niul biar dae eil mel Yoxrtaexl su ca mel yarzi vuxryixr,^b Yoxrtaexl su nr nga ca mel zzir dae a yarzi medeil. ²⁴ Nael Arbosobo tiur teixl lei ca hal mel, Yoxrtaexl

^a**1:19** Yirsaexlyal Sul 29:14 leil vaexr dae.

^b**1:23** Xilaxl ddar bbeix “niul biar dae eil mel Yoxrtaexl su ca mel leil baxl quirle gger legelbbe taex nga a.” Yilsu mel dder Barloxr biar dae mel Yoxrtaexl su ca mel noni dil nr ddo.

su ca bbeixsael Yoxrtaexl su nr nga ca zzorbbeixlei, yaa Zidu bei dae mel leil i a dder Arbosobo mel yarzi ddo, yarzi olnolddu saexl ddo.

²⁵ Arbosobo mel arsaе medeil zzorbbeixlei bir ca leil olnolddu leixl; arsaе naexlbix zzorbbeixlei bir ca leil sexr leixl.

²⁶ Arzzi-nimar arzzi-nimo mel, nia arleixr holcir, Arbosobo nia leil tiur a yar ddei cassor-worssor bei lo halcar, ca mel i dae a nia olnolddu su mel nganiul, quexrlixl zza su lei nganiul, armael ake ca hhexr middux su lei nganiul. ²⁷ Nael Arbosobo hherdder ca mel i dae a ca medeil eil mel leil tiur a, olnolddu su ca mel leil seixlda lol, yoxl quexrlixl nr zza ca mel leil tiur a, quexrlixl zza ca mel leil seixlda lol. ^c ²⁸ Arbosobo lei halae mer woxrke arseir lei i nr du ca hal mel leil nei arseir lei vuxryixr ca hal mel leil tiur, hherdder quexrlixl nr zza ca mel leil tiur. Yar eine bei a mel, middurbbor ca mel zzir dae a zoxl-nr-yoxl hal mel leil zoxlyoxl loxr lol.

²⁹ Yel arseir lei Arbosobo meixsaer qier leil armael leil kuar nr cexr.

³⁰ Arbosobo mel nia leil Yisu Zidu dax hher ji dae lol. Yar Zidu bei dae mel leil ngol dae a niul leil yar yarzi olnolddu saexl lol. Zidu niul leil zuixl mel gga jiuxl teixl lei, niul leil seirceix-seirmaer loxr lol, niul leil zuixl nr zza i mal gger. ³¹ Yel Arbosobo Ddei Sul ber leil vaexr dae mel sael a nga, bbeix: “Arseir kuar arddeirnga a mel, Seirpor bei dae mel leil kuar nia,”^d eine bbeix a.

2

¹⁻² Arzzi-nimar arzzi-nimo mel, ngo halleix dder xiar har ho a; nia dax

^c**1:27** Ca medeil eil mel nael Yisu leil ddarzzi su mel leil bbeix; olnolddu su ca mel nael Yisu leil ddar-nr-zzi su mel leil bbeix. Barloxr eine bbeix a mel yar saexl, Yisu leil ddar-nr-zzi su ca mel zzir dae a Yisu leil ddarzzi su mel medeil, armael nael jilixr a nga arddeir a.

^d**1:31** Yilixlmir Sul 9:24 leil vaexr dae.

cirgo a hher dae car, ngo kebal hal mel leil nr biar, Yisu Zidu leil nei yar sixrzixljiaxl leil diexr zil eil mel leil lar biar. Yel ngo Arbosobo ddei ddar^e mel nia leil biar gger car, ngo mel ddarseir-ddarzae nei ca mel zzir dae a yarzi olnolddu ddar hal mel nr sser. ³ Ngo nia dax halmaex hher dae car, nixmox zzae nixmox ye, gexr zzae gexr, lixlix-laexlaexmo. ⁴ Ngo nia leil Arbosobo ddei ddar biar gger a mel ddar noni zaezaemo olnoldduddumo hal yoxr sser a biar dae nr nga a nei, Arbosobo ddei Xiu ddei ddoddomo bei dae hal mel leil koxl dae a biar arddeir a. ⁵ Nia leil ddarzzi lol a mel, ca mel yarzi olnolddu bbeix dae hal mel leil koxl dae nr nga, Arbosobo ddoddomo bei dae mel leil koxl dae arddeir a.

Arbosobo Ddei Xiu Ddei Cirza-hanga Lei Saexl

⁶ Eine nga bbeixarnar, Arbosobo leil vever a ddarzzi su ca mel dax nael, ngua lei yarzi olnolddu ddar hal mel biar.^f Nael ngua middurbbor ddei cassor-worssor nei vaervaerpor zzir dae a olnolddu ddar hal mel biar nr nga. Arddolcar a ca eil mel azo lei nr per. ⁷ Ngua nia dax biar dae eil mel mel halleix Arbosobo ca leil nr saexl lol yarzi olnolddu ddar mel nga a. Hherdder azo lei nr zza seir, Arbosobo niul leil middux lol nia dixl har zaxr dae hal mel nga a. ⁸ Arbosobo yarzi olnolddu bei dae mel, middurbbor vaervaerpor mel saexl su arddeir nr zza. Yaa saexl arddeirnga a mel yaa dder yarzi middux Seirpor ddei leil sixrzixljiaxl leil diexr ngexl nr gger a. ⁹ Hherdder Arbosobo Ddei Sul ber leil vaexr dae mel sael a nga, bbeix:

^e**2:1-2** *Arbosobo ddei ddar* Barloxr Arbosobo ddei ddar biar a mel zoxlzoxl a halleix ca leil nr saexl lol hal mel biar.

^f**2:6** Barloxr biar dae mel mel dder Yisu Zidu sixrzixljiaxl leil diexr zil a mel, ca mel leil zuixl mel gga jiuxl teixl lei.

“Arbosobo yar leil perniar su ca mel leil bei har zaxr gger dae mel,
zeixleixr lei mia nr goxr,
zeixleixr lei bbejjiur nr goxr,
nixmox zzar lei zeixleixr xiar ci nr goxr,”⁹

eine bbeix a.

¹⁰ Nael Arbosobo yar ddei Xiu ddei leil sser dae a eil mel niul leil saexl lol a.

Eil ddei mel Arbosobo ddei Xiu ddei azo lei i bei xie; Arbosobo ca leil nr saexl lol mel lei yar i bei xie a nga arddeir a. ¹¹ Armael xiu ddei larnei armael nixmox zzar azo xiar dae saexl. Ciryoxr a nga, Arbosobo ddei Xiu ddei larnei Arbosobo azo xiar dae saexl. ¹² Niul dax hher ji dae xiu ddei mel Arbosobo ddei Xiu ddei a.^h Yel niul middurbbor ca mel xiar dae hal mel dax bei nr mae. Arbosobo ddei Xiu ddei mel Arbosobo niul leil cirza-hanga seirseir meixl gger dae mel niul leil saexl lol a. ¹³ Ngua biar dae ddar mel mel middurbbor olnolddu su ca mel ngua leil mul gger nr nga. Arbosobo ddei Xiu ddei ngua leil mul gger arddeir a. Ngua mel Arbosobo ddei Xiu ddei ngua leil mul gger mel sser a, Arbosobo ddei ddarzi mel ca mel leil mul gger. ¹⁴ Nael Arbosobo ddei Xiu ddei yaa nixmox zzar hher nr ji dae ca mel, Arbosobo ddei Xiu ddei mul gger dae ddar eil mel noni dil nr xie; doxgoxleixr yaa zzir dae a yarzi medeil. Yaa eil mel leil saexl nr var. Arbosobo ddei Xiu ddei yaa nixmox zzar hher ji dae ca mel saelnei eil mel leil saexl. ¹⁵ Arbosobo ddei Xiu ddei yaa nixmox zzar hher ji dae ca mel mel azo lei i bei xie, nael Arbosobo ddei

⁹2:9 Yirsaexlyal Sul 64:4 leil vaexr dae.

^h2:12 *Niul dax hher ji dae xiu ddei mel Arbosobo ddei Xiu ddei a.* Yisu leil ddarzzi su ca mel armael ddei xiu ddei lar yar dax hher ji dae nr nga a nei, Arbosobo ddei Xiu ddei lei yar dax hher ji dae.

Xiu ddei nixmox zzar hher nr ji dae ca mel zzael yaa leil i bei nr xie.

¹⁶Arbosobo Ddei Sul ber leil bbeix:

“Arseir Seirpor nixmox zzar arsae xiar dae saexl bbeixleir?

Arseir yar leil mul gger var bbeixleir?”ⁱ

eine bbeix a.

Nael niul mel Zidu nixmox zzar arsae xiar dae saexl. Eil ddei mel
Arbosobo ddei Xiu ddei niul nixmox zzar hher ji dae a nga arddeir a.

3

Yisu Leil Ddarzzi Su Arsae Bei Nia

¹Arzzi-nimar arzzi-nimo mel, ngo halleix nia dax ddar biar dae car,
ngo i dae a Arbosobo ddei Xiu ddei nia leil nr guaxr, armael ddei xiu ddei
nia leil guaxr.^j Nia Yisu Zidu leil ddarzzi a ngaseir, cirza-hanga lei nr
saexl seir, hherdder anix bexlelte sael a nga. ²Halleix nia Arbosobo
ddei ddar mel hormolsael a noni wo nr xie, yel ngo nia leil noni wo sol
mel mul nr gger, noni wo so mel lar mul gger, hherdder nia leil almeixr
nr zol baxr lar da sael a nga.^k Nia mel eilleix ci a lei halae noni wo nr xie.

³Nia noni wo nr xie a mel, armael xiar dae mel dax bei mae dae a
zzicarzzi leil nixnox, zzicarzzi dax zex a nga arddeir a. Nia eine bei a
mel Arbosobo leil ddar-nr-zzi su ca mel sael a nga zzarmar? ⁴Nia ca mel

ⁱ**2:16** Yirsaexlyal Sul 40:13 leil vaexr dae.

^j**3:1** Barloxr i dae a ca eil mel Arbosobo ddei Xiu ddei xiar dae mel dax
hormolsael bei nr mae, yaa armael xiar dae mel dax bbeixsael neir xiar
dae mel dax bei mae.

^k**3:2** Xiboxrlaexr Sul 5:11-14 i cexr.

gga cirmelmel a bbeix: “Ngo mel Barloxr dax bei mae dae.” Cirmelmel a bbeix: “Ngo mel Yalboloxr dax bei mae dae.” Nia eine bbeix a mel, Arbosobo leil ddar-nr-zzi su ca mel dax ciryoxxr a nr nga arddol lei bbeixleir?

⁵ Yalboloxr azo suax bbeixleir? Ngo Barloxr azo suax bbeixleir? Nr nga Seirpor leil miar bei gger su ca lar cirmel a zzarmar? Ngua Seirpor ngua leil bei lol mel bei a, (nia leil beijjiu a) Yisu Zidu leil ddarzzi lol. ⁶ Bir dae a bbeix: ngo dae ji ho a, Yalboloxr ajjix her, nael yarzzei mel leil ner du lei lol su ddei mel Arbosobo a.¹ ⁷ Eine nga a, dae ji su nei ajjix her su lei azo suax nr ddo. Arbosobo larnei yarzzei mel leil ner du lei lol var. Yar larnei zoxlyoxl. ⁸ Dae ji su mel nei ajjix her su mel lei ciryoxxr a nga. Arddolcar a mel, yaa armael bei dae mel dax zox dae a, yaa li wo mibbe mel Arbosobo yaa leil gger. ⁹ Ngua mel miar bei carbeix a. Ngua Arbosobo leil miar bei gger. Nia nael Arbosobo paxr dae mi mel sael a nga, halae yar zi teixl lei xi mel sael a nga.

¹⁰ Ngo zeixleixr birdae a bbeix: ngo mel Arbosobo ngo leil seirseir meixl gger mel dax zox dae a, xi zi su yarzi bbesur zza ca hal ddei sael a sixrjiuxr xiax har ho a; kebal ca mel nael zi deix si. Nael cirddeir-hanga lei zabbar seirseir a zi nia. ¹¹ Yisu Zidu mel dder sixrjiuxr xiax har dae hal ddei nga a. Yar leil cuxrteixl a mel arseir lei kebal sixrjiuxr xiax box ssi nr cexr.^m ¹² Bir dae a bbeix, ca mel piu, sae, balsixr, sixlerte, silbbar

^l**3:6** Ngo dae ji ho a, Yalboloxr ajjix her, nael yarzzei mel leil ner du lei lol su ddei mel Arbosobo a. Ddar eil qier ddei yilsi mel dder Barloxr hoba Yisu ddei ddar seirseir mel yaa leil biar gger beil, Yalboloxr nael yaa leil mul gger dax. Nael Arbosobo yar ddei Xiu ddei ca mel leil gger a saelnei yaa noni wo xie.

^m**3:11** Sixrjiuxr mel hherdder Yisu ddei ddar seirseir mel leil bbeix. Barloxr sixrjiuxr xiax beil a yilsi mel ddei dder Yisu ddar seirseir mel ca

bbeixsael sobexl sser a sixrjiuxr ddei leil xi zi deix arddeirnga zorbbeixlei;^{n 13} arddolcar a Zidu ca leil ser nixixl ci a mel, adoxl sser a, yaa cirddeir-hanga xi zi du lei mel leil cu a, yarzi nganga bbe sixr i nia. Yel hane ci a mel, yaa miar bei dae mel seir bbeixsael nr seir arseir lei mia ddo. ¹⁴ Arseir sixrjiuxr hal ddei leil xi zi deix dae a, adoxl cu a lei cu pixl nr var arddeirnga a, yar dder Arbosobo yar leil seirseir gger mel li wo ddo. ¹⁵ Arseir xi zi teixl lei mel adoxl cu a, cu pixl arddeirnga a, yar dder baexr a zi a. Yar adoxl herhelher bbiu dae hal mel gga beix teixl lei sael a nga, yar olga ddei leil lar jiuxl wo.^o

¹⁶ Holbbaexl nia ddei ggecir ddei mel Arbosobo hher ggie xi ddei sael a nga, Arbosobo ddei Xiu ddei nia nixmox zzar hher ji dae, nia nr saexl a ngo? ¹⁷ Arbosobo hher ggie xi ddei mel seirceix-seirmaer. Nia mel dder yar hher ggie xi ddei sael a nga, yel arseir Arbosobo ddei xi ddei leil bei xiaxr gger arddeirnga a mel, Arbosobo dder ca hal ddei leil bei no gger.

¹⁸ Nia armael leil fur nr ddo. Nia ca mel gga arseir Yisu leil ddar-nr-zzi su ca mel xiar dae mel dax zox dae a armael yarzi olnolddu, nia nael yarzi medeil eine zzir dae arddeirnga a, yaa leil zzir lol ddo a. Eine nga a mel nia dder Arbosobo xiar dae mel dax zox dae a yarzi olnolddu su ca hal mel loxr a. ¹⁹ Middurbbor ca mel zzir dae a yarzi olnolddu hal mel,

mel leil biar gger beil. Kebal ca mel xi zi deix a yilsi mel dder zeixleixr biar gger dax lei.

^{n3:12} Piu, sae, balsixr cirza-hanga eil mel Arbosobo leil middux lol a bei, miar hal mel leil bbeix. Sixlerte, silbbar, sobexl eil mel ca leil middux lol a bei, miar hal mel leil bbeix.

^{o3:15} Yisu hoba sixrzixljiaxl leil si a ca mel leil jiuxl. Giedae Barloxr ca mel leil Yisu ddei ddar seirseir mel biar gger ssi. Yoxl kebal ca mel lei biar gger ssi. Zoxlyoxl ddei mel dder Yisu ca leil jiuxl. Eil ddei mel xi ddei sixrjiuxr sael a nga.

Arbosobo i dae a medeil. Hherdder Arbosobo Ddei Sul ber leil vaexr dae mel sael a nga, bbeix: “Seirpor mel olnolddu su ca hal mel nr seir xiar dae mel yaa armael leil xiagl ji dae lol.”^p ²⁰Yoxl bbeix: “Seirpor saexl, jilixr su ca mel xiar dae hal mel sser nr cexr,”^q eine bbeix a. ²¹Yel nia arseir lei armael ddei sulmulsu leil kuar gger nr ddo. Arbosobo mel cirza-hanga maelmaerjjia nia leil gger a nia leil seir lol. ²²Hherdder Yalboloxr, Birdaexr, nei ngo leil nia ddei sulmulsu bei lol, halae si bbeixsael gol dae, eilleix bbeixsael arddolcar a, middurbbor eilzzu maelmaerjjia lei Arbosobo nia leil gger a nia leil seir lol. ²³Nia nael Zidu dax hher ji dae, Zidu nael Arbosobo dax hher ji dae.

4

Yisu Miardal Dae Ca Mel

¹Yel nia mel ngua leil Zidu leil miar bei gger su ca i mal gger nia. Ngua ddei miar ddei mel hherdder Arbosobo halleix ca leil nr saexl lol Yisu leil biar dae ddar seirseir hal mel ca leil biar gger. ²Ngua miar guaxr gger su ca bei a mel yarzi koxlsseiddo nia. ³Nia bbeixsael kebal ca mel ngo leil arsae lerler bota zzorbbeixlei nr zzi. Ngo mel armael leil cur nr cix. ⁴Ngo zzir dae a ngo bei nr cox bbeixarnar, nael eine nga a dder ngo nixmox seir gaxzi bbeix nr cexr. Ngo leil ser su ddei mel Seirpor a. ⁵Yel Seirpor jjixr lei nixixl ddei nr ci seir mel, nia arseir leil lei bota nr ddo. Yar jjixr lei hal cir ni ci a mel, ca nixmox zzar arsae lerler xiar ji dae nei si leil nr saexl lol hal mel yar arseir leil lei saexl lol var. Ca cirddeir-hanga lei yaa arsae bei mel Arbosobo dder yaa leil arsae kuar gger var.

⁶Arzzi-nimar arzzi-nimo mel, ngo armael leil nei Yalboloxr leil biar ci a

^p**3:19** Yueboxr Sul 5:13 leil vaexr dae.

^q**3:20** Sipi Sul 94:11 leil vaexr dae.

mel nia leil seir lol. Ngu a eine bei a mel nia leil saexl lol “Arbosobo Ddei Sul ber leil vaexr dae mel bei a dder ddo a.” Nr nga a nia olvaer a, eil ddei leil i du zzae hal ddei leil i ze. ⁷ Arseir bbeix ni bir kebal ca mel leil seir leixl bbeixleir? Ni hazza mel arddolyox Arbosobo ni leil gger nr nga bbeixleir? Arbosobo ni leil gger a mel ni halae arsaenga a, yar ni leil gger nr nga mel sael a armael leil kuar gger leir?

⁸ Nia zzir dae a nia cirza-hanga lei zza ho a, yarzi be ho a. ⁵ Ngu a nia leil bei-nr-jjiu lei, nia (Arbosobo ddei goxr gga) zzirmar bei dae ho a ngo? Ngu a doxl nia leil yarzi Arbosobo ddei goxr gga zzirmar bei dae ho a loxia, eine nga a mel ngu a dder nia dax cirgo a zzirmar bei cexr a. ⁹ Ngo i dae a Arbosobo mel Yisu miardal dae ca mel leil hherdder ngu a leil mi-nr-ddux lol, hherdder loxrgier dae a si nia ca hal mel sael a nga. Yel mer woxrke ca nei merlabbor tisir maelmaerjia leil igax lol.

¹⁰ Middurbbor ddei ca mel zzir dae a ngu a Zidu leil weix a ca medeil loxr a; nia zzir dae a nia zzael Zidu leil koxl dae a ca jilixr mel loxr a! Yaa ngu a leil zzae yarzi naexlbix i mal gger, nia leil zzae yarzi sexr i mal gger! Ngu a leil zzae i ze, nia leil zzae i du! ¹¹ Eilleix ci a lei ngu a meixr zzae meixr, sixl zzae sixl, ggecir leil lomelmel a veixrddu pia lei ar xiux nr zza, si ngu a leil deil doxr, ake lei ar ddei nr zza. ¹² Ngu a armael ddei armael ngu a sser zoxr mel sulku ssi; si ngu a leil hie no a lei, ngu a si leil seir lol; si ngu a leil bixr a lei, ngu a sser gex dae. ¹³ Si ngu a leil nrbba nrbba bbeix a lei, ngu a seilseir a yaa leil ddarkoxl. Eilleix zzeze ci a lei, ca mel halae ngu a leil middurbbor yarzi cexr nr ddo ca hal mel i mal gger, hherdder cirbelde sael a i mal gger.

¹⁴ Ngo ddar eil mel vaexr a mel, nia leil seixlda lol nr nga, nia leil ngo

⁵**4:8** *Nia zzir dae a nia cirza-hanga lei zza ho a, yarzi be ho a. Ddar eil qier ddei yilsi mel dder yaa zzir dae a Arbosobo ddei Xiu ddei cirza-hanga bbesur lei yaa leil gger ho a.*

perniar dae aniux mel sael a quex arnar a. ¹⁵ Nia Zidu leil ddarzzi a, nia ddei sulmulsu mel cirmeixr sael zza bbeixarnar, arbbor mel nr miur. Ngo mel Yisu Zidu leil biar dae ddar seirseir mel nia leil biar gger a, nia leil yar leil ddarzzi lol a, ngo nia ddei arbbor sael a nga. ¹⁶ Yel ngo nia leil quex, nia ngo dax bei zza nia. ¹⁷ Hherdder eine nga a ngo Tixrmoxrtaexl leil nia dax halmaex ssi lol. Yar mel ngo perniar dae ssor ddei nga a. Yar Seirpor leil miar bei gger a yarzi ddarzziddo. Ngo Yisu Zidu leil ddarzzi a arsae lerler bei dae mel, yar nia leil biar gger var. Ngo bei dae mel hherdder ngo cirmaex-hanga jiaxlhuixl gga mul gger dae mel dax ciryoxr a nga.

¹⁸ Nia ca mel gga cirmelmel a ngo nia dax halmaex lei ci nr var zzir dae a, yaa dder yarzi olvaer du lei a. ¹⁹ Nael Seirpor ngo leil ssi lol arddeirnga a, ngo cirleixr dder nia dax halmaex lei a. Ngo, yarzi olvaer ca hal mel bbeix dae ddar mel leil noni lei nr nga a nei, Arbosobo yaa leil azo bei bbesur zza lol a bbe i lei. ²⁰ Arseir yarzi Arbosobo ddei goxr gga ca a neil? Ca mel yaa azo lerler bbeix dae ddar mel leil noni nr nga naer, Arbosobo yaa leil ddoddomo bei lol hal mel leil i arddeir a naer. ²¹ Ngo nia dax lei car, nia ngo leil nia leil faxr lei lol bbeixsael ddar norlixlix sser a, zabbar seirseir a biar lei lol, nia leil perniar lei lol neil? Nia ar yoxr tiur ddo a.

5

Yisu Leil Ddarzzi Su Mel Capor Ssormaer Zzidax Nrbba Nrbba Bei Nr Ddo

¹ Ngo ddar lei ddarzzi nr bel, ngo bbejjiur a bbeix, nia jiaxlhuixl gga capor ssormaer mel zzi dax nrbba nrbba bei, hherdder ca arddeir a yarbbor ddei maeryemo dax pil. Eil mel mel Yisu leil ddar-nr-zzi su ca

mel lei bei su nr zza. ² Nael nia halae yarzi col.^t Yar eine bei a mel nia nixmox no nia, yar leil nia dax ggaxr teixl gger nia zzarmar? ³ Ngo mel ca ddei nia dax halmaex nr hher dae bbeixarnar, ngo nixmox zzar nia leil xiar dae. Hherdder ngo ca ddei malmal nia dax cirgo a hher dax dae a eine bei su ca hal ddei leil serpaxl ho sael a nga a. ⁴ Nia cirgo a hher dae car, ngo nixmox ddei nia dax cirgo a hher dax dae, nia niul ddei Seirpor Yisu ddei quexrlixl mel leil koxl dae nei yar ddoddomo bei dae mel leil koxl dae a, ⁵ ca eil ddei leil Sardaxl te leil jia gger nia. Eine nga a mel yar zeixleixr zuixl bei nr meixr. Yel Seirpor jjixr lei nixixl ddei ci a yar ddei xiu ddei leil jiuxl wo lol.

⁶ Nia kuar a mel nr seir. Bir dae a bbeix: zzir cirdoxr a ji lei aba bex cirtaex-lorbba leil faex du leil lol var nia nr saexl a ngo?^{u 7-8} Nia mel dder zzir ji nr goxr aba bex yarsixl sael a nga, yel zzir yarli mel piar pixl nia.^v Zzir yarli mel dder halleix yarzi gexrddo, yarzi nr seir bei dae hal mel. Aba yarsixl mel dder nixmox zzar yarzi koxlsseiddo yarzi ddarzziddo hal mel leil bbeix. Zidu mel niul Yuelyuel jiax goxr a seixllabox ya ddei nga a. Yel niul jiax eil ddei goxr a mel zzir yarli mel sser nr ddo, zzir ji nr goxr aba yarsixl mel sser nia.^w

^t**5:2** *Nael nia halae yarzi col.* Gelixrdo jiaxlhuixl gga ca mel zzir dae a yaa jiaxlhuixl ddei yarzi seir.

^u**5:6** Yilsi mel dder nia ca mel gga ca ar ddei a nrbba nrbba bei a, yar nia maelmaerjia leil zzasol lol var, nia leil zuixl bei lol var.

^v**5:7-8** Zidu mel niul leil weix a si a, niul Arbosobo ddei cassor-worssor loxr a. Yel niul zuixl bei ssi nr ddo halae niul dax cirgo a ca mel leil zuixl bei lol nr ddo. Niul mel hherdder zzir ji nr goxr aba mel sael a nga. Niul zuixl bei meixr su ca mel leil ggaxr teixl gger nia. Yaa mel dder zzir mel sael a nga.

^w**5:7-8** Cu'aezixr Sul 12:1-30 Yuelyuel Jiax nei Zzir Ji Nr Goxr Aba Zzor

⁹ Ngo halleix xil vaexr a dder nia leil capor ssormaer nrbba nrbba bei su mel dax naer nr ddo bbeix gger goxr a. ¹⁰ Nael ngo ddar eil mel bbeix a mel, Yisu leil ddar-nr-zzi su mel, capor ssormaer nrbba nrbba bei, yarzi meixneixl, si leil zzirbae ka, bbeixsael bbex leil zi su hal mel leil jiujiu bbeix nr nga. Ngo ca maelmaerjjia leil bbeix arddeirnga a, nrbba nia dder middurbbor nr hher a sael ca eil mel dax nr naer bei cexr. ¹¹ Ngo ddei yilsi mel dder bbeix, armael ddei armael Yisu leil ddarzzi su a eine bbeix dae, nael halae capor ssormaer zzi dax nrbba nrbba bei, yarzi meixneixl, bbex leil zi, ca leil hie vuxryixr, zzidda-zziyixr bei, si leil zzirbae ka, ca eil mel dax naer nr ddo bbeix arddeir a. Nia yaa dax cirgo a zzo lei bax zzor nr ddo.

¹² Yisu leil ddar-nr-zzi su hal mel leil ser a mel ngo bei mi-nr-bbe, nael Yisu leil ddarzzi su ca mel zuixl bei a, yaa leil ser a mel nia bei mibbe zzarmar? ¹³ Yisu leil ddar-nr-zzi su ca hal mel mel Arbosobo yaa leil ser leilei. Arbosobo Ddei Sul ber leil bbeix: “Nia yarzi gexrddo bei su ca mel leil nia dax ggaxr teixl gger nia,”^x eine bbeix a.

6

Yisu Leil Ddarzzi Su Ca Mel Zzi Leil Goxl A Ddar-nr-zzi Su Mel Dax Goxl Ssi Nr Ddo

¹ Nia zzicarzzi dax azo lerler zex a, arsaenga a Arbosobo ddei cassor-worssor mel leil nia leil bei-nr-jjiu lol leir? Arsaenga a Yisu leil ddar-nr-zzi su mel dax goxl ci leir? ² Arbosobo ddei cassor-worssor mel, arddolcar a middurbbor ca mel leil ser nia, nia saexl zzarmar? Nia

Jiax goxr a arsae goxr biar dae.

^x5:13 Semixljil Sul 17:7; 19:19; 21:21; 22:21, 22:24; 24:7 leil vaexr dae.

middurbbor ca mel leil lei ser arddeirnga a mel, zzi dax zex ddu eine a cirdoxr leil mel nia ser piar zzarmar? ³ Hane ci a mel niul halae tisir mel leil ser nia, nia saexl zzarmar? Hane lar ci doxr a mel niul gielgiel ser bbesur nr zza arddollei bbeixleir? ⁴ Halmel, nia zzicarzzi dax azo lerler zex ddu pex dae arddeirnga a, arsaenga a Yisu leil ddar-nr-zzi su ca hal mel leil ser gger lol leir? Jiaxlhuixl gga quexrlixl nr zza ca mel lei bir yaa leil ser var. ⁵ Ngo ddar eil mel bbeix a mel nia leil seixlda lol arddeir a. Holbbaexl nia ca mel gga arzzi-nimar arzzi-nimo zzi dax zex dae eil mel leil ser bbesur zza olno-ddu su ca lei arddeir nr zza a ngo? ⁶ Nael nia mel arzzi-nimar arzzi-nimo lei zzicarzzi leil goxl ssi, halae Yisu leil ddar-nr-zzi su ca mel meixsaer qier leil lei goxl ci leir?

⁷ Nia zzicarzzi leil goxl ssi eil ddei mel bei nr hoxr zildu ho a. Arsaenga a si nia leil cirdoxr lei ci lol nr ddo? Arsaenga a si dax cirdoxr lei cixrkui nr ddo? ⁸ Nia zzael arzzi-nimar arzzi-nimo leil ci, yaa leil nia dax cixrkui lol.

⁹ Holbbaexl nr seir bei su ca mel Arbosobo ddei goxr gga ddir nr cexr nia nr saexl a ngo? Armael leil fur nr ddo. Capor ssormaer zzi dax nrbba nrbba bei su, bbex leil zi su, zzi dax kerjiaer su, capor ggecir vurler su, capor car capor lizoxr su, ¹⁰ zzaegu ker su, meixneixl su, zzidax-zzie su, ca leil hie vuxryixr su, si leil azo lerler ka su eil mel mel Arbosobo ddei goxr gga ddir wo nr ddo. ¹¹ Nia ca mel gga cirmelmel a lei halleix yaa sael a eine bei goxr a. Nael eilleix nia Seirpor Yisu Zidu leil koxl dae nei Arbosobo ddei Xiu ddei leil koxl dae a, nia ddei zuixl bei pixl gger ho a; Arbosobo nia leil zuixl nr zza i mal gger ho a; Arbosobo ddei cassor-worssor seirceix-seirmaer mel loxr ho a.

Capor Ssormaer Nrbba-nrbba Bei Nr Ddo

¹² Ca cirmelmel a bbeix: “Ngo azo lei bei cexr,” eine bbeix. Nael maelmaerjia lei ca dax seirggiebbær zza nr nga. Ngo azo lei bei cexr

bbeixarnar, nael ngo azo lei ngo leil guaxr nr gex dae lol.^y ¹³ Ca cirmelmel a bbeix: “Zzorlabox mel xilbe taex leil weix, xilbe taex mel zzorlabox leil weix.”^z Nael arddolcar a, eil nr yoxr jjia lei Arbosobo bei xiaxr gger nia.^a Niul ddei ggecir ddei sser a capor ssormaer nrbba nrbba bei nr ddo; Seirpor leil weix a seirseir bei nia. Seirpor niul ggecir ddei leil guaxr gger dae. ¹⁴ Arbosobo mel ddoddomo bei a niul ddei Seirpor si a lei yoxl yar leil gol du xixl lei lol ho a; arddolcar a, niul si ho a lei yar niul leil gol du xixl lei lol nia. ¹⁵ Nia ggecir ddei mel Zidu leil niar gex dae holbbaexl nia nr saexl a ngo? Nia armael leil ggecir vurlelsu ssormaer mel dax cirgo a niar gex dae lol ddo a ngo? Arsaebeilei nr ddo mar!^b ¹⁶ Nia ggecir vurlelsu ssormaer dax cirgo a niar gex dae a mel yar dax ggecir cirddeir a loxr sael a nga, holbbaexl nia nr saexl a ngo? Arbosobo Ddei Sul ber leil bbeix: “Ca nnel a mel cirddeir sael a loxr ho a,”^c eine bbeix a. ¹⁷ Nael Seirpor dax cirgo a niar gex dae su mel yar dax xiu cirddeir a zza sael a nga a.

^y**6:12** *Ngo azo lei bei cexr bbeixarnar, nael ngo azo lei ngo leil guaxr nr gex dae lol.* Ddar eil qier ddei yilsi mel dder Yisu leil ddarzzi su mel azo lerler bei a lei armael leil guaxr ssei xie nia, zuixl bei ssi lol nr ddo.

^z**6:13** *Zzorlabox mel xilbe taex leil weix, xilbe taex mel zzorlabox leil weix* Ddar eil qier ddei yilsi mel dder arddolcar lei azo zzor niazzir mel dder zzor cexr. Ciryoxr a nga, ddar eil qier bbeix su ca mel zzir dae a arddolcar lei ssormaer arddol mel dax naer niazzir mel dder naer cexr.

^a**6:13** *Nael arddolcar a, eil nr yoxr jjia lei Arbosobo bei xiaxr gger nia.* Ddar eil qier ddei yilsi mel dder arddolcar a mel zzo meixr nr var, zzor nr ssa.

^b**6:15** *Yaa eine bei a mel yaa Zidu leil ggecir vurlelsu ssormaer mel dax lei cirgo a niar gex dae lol.*

^c**6:16** *Cuaxlsixljil Sul 2:24 leil vaexr dae.*

¹⁸Nia capor ssormaer nrbba nrbba bei nr ddo. Ca mel azo lerler zuixl bei a lei ggecir ddei leil nr ddeix; capor ssormaer zzi dax nrbba nrbba bei zuixl mel ggecir ddei leil ddeix. ¹⁹⁻²⁰Nia ddei ggecir ddei mel Arbosobo ddei Xiu ddei hher ggie xi ddei nga a; Arbosobo yar ddei Xiu ddei leil nia nixmox zzar hher ji dae lol holbbaexl nia nr saexl a ngo? Arbosobo mel yar Ssorzil leil si lol a nia leil vae xixl lei a hherdder zuixl mel gga jiuxl xixl lei. Eine nga a, nia ca ddei mel armael ddei nr nga. Yel nia ggecir ddei sser a, Arbosobo leil middux lol nia.

7

Capor Maerssor Mel Leil Biar

¹Nia ngo leil xil vaexr gger a biar dae hal mel, ngo zzir dae a capor mel ssormaer dax nr naer arddeirnga bbaexl seir a. ²Nael capor ssormaer mel leil zzi dax nrbba nrbba bei lol nia-nr-zzir a mel, capor ddei lei armael ddei maerssor arddeir zza nia, ssormaer ddei lei armael ddei capor arddeir zza nia. ³Capor maerssor nga a mel, capor ddei lei yar bei mibbe mel bei nia, maerssor ddei lei yar bei mibbe mel bei nia.

⁴Maerssor ddei ggecir ddei mel yar armael ddei lar nr nga, yar capor ddei lei ca dae. Ciryoxr a nga, capor ddei ggecir ddei lei yar armael ddei lar nr nga, yar maerssor ddei lei ca dae. ⁵Capor maerssor mel armael ddei armael argo yixr eine bei nr ddo. Nrbba dder Arbosobo dax ddar biar niazzir a, nnel jjia lei eine bei ggese a nga arnar. Nael hane goxr ho a mel cirgo a yixr nia. Nr nga a Sardaxl te nia armael leil guaxr ssei nr xie halcar leil jiux dae a nia leil nol leilei. ⁶Ngo ddar eil qier bbeix a mel, nia leil eine bei ddo bbeix gger arnar, nia leil miardal nr nga. ⁷Ngo mel ca maelmaerjjia lei ngo sael a cirmuzil a goxr loxia. Nael Arbosobo ca cirddeir-hanga leil seirseir meixl gger dae hal mel mel ciryoxr a nr nga, cirmelmel leil a nael maerssor zza lol, cirmelmel leil a nael maerssor nr

zza lol.

⁸ Maerssor nr bbeix su nei capor nr zo seir ca mel, halae maermocir mel ngo yaa leil bbeix gger: yaa ngo sael a cirmuzil a eine goxr zeir si a dder seir a. ⁹ Nael yaa armael leil guaxr ssei nr xie arddeirnga a mel dder ssormaer mel si leil fu gger ddo, capor mel lei maerssor bbeix ddo. Capor ssormaer mel zzi dax naer niazzir a nixmox zzar xiar ji dae bulqie jixrhui a gielgiel seir.

¹⁰⁻¹¹ Jixrhui ho ca mel leil nael ngo yaa leil bbeix gger: maerssor ddei armael capor dax bbe kae nr ddo. Yar armael capor dax bbe kae ho arddeirnga a lei kebal ca leil fu gger nr ddo, nr nga a nael armael capor dax seir xixl nia. Capor ddei lei armael maerssor leil nr li bei nr ddo. Eil mel mel ngo nia leil miardal nr nga, Seirpor miardal arddeir a.

¹²⁻¹³ Kebal ca mel leil lei ngo yaa leil bbeix gger, birdae a bbeix arzzi-nimar arddeir a, yar maerssor ddei Yisu leil ddar-nr-zzi, nael yar maerssor ddei yar dax cirgo a goxr dax yuex arddeirnga a mel, yar dder yar leil nr li bei nr ddo. Bir dae a bbeix maerssor ddei Yisu leil ddarzzi, nael capor ddei ddar-nr-zzi arddeirnga a lei, yar capor ddei yar dax cirgo a goxr dax yuex a mel yar dder yar leil nr li bei nr ddo. Eil ddei mel Seirpor bbeix nr nga a nei, ngo bbeix a. ¹⁴ Capor ddei ddar-nr-zzi lei maerssor ddei ddarzzi a mel, capor ddei leil lei seibeix lol ho sael a nga; maerssor ddei ddar-nr-zzi lei capor ddei ddarzzi a mel, maerssor ddei leil lei seibeix lol ho sael a nga. Nr nga a mel, yaa aniux mel dder sei-nr-beix a; nael eilcar mel yaa mel seibeix ho sael a nga, yel zzicarzzi leil nr li bei nr ddo.

¹⁵ Arbosobo niul leil tiur teixl lei a mel niul leil zzi dax toltor a nixixl goxr lol arddeir a. Yisu leil ddar-nr-zzi su capor ddei bbeixsael maerssor ddei ddoddo-nrddo ssi du si arddeirnga a mel, nia dder yar leil ssi lol ddo. Eine nga a mel, Yisu leil ddarzzi su capor ddei bbeixsael maerssor

ddei lei armael lozza a. ¹⁶ Nia maerssor mel, Yisu nia bei dae mel leil sser dae a, nia capor ddei leil jiuxl var jiuxl nr var mel, nia arsae saexl bbeixleir? Nia capor mel lei, Yisu nia bei dae mel leil sser dae a, nia maerssor ddei leil jiuxl var jiuxl nr var mel nia arsae saexl bbeixleir?

¹⁷ Seirpor nia leil arsae nixixl goxr lol a mel, nia arsae goxr nia.

Arbosobo nia leil tiur teixl lei a yar leil ddarzzi halcar arsae nga mel, eilleix lei hal mel dax zox dae a goxr ze si nia. Cirmaex-hanga jiaxlhuixl leil lei ngo eil mel sael a miardal dae. ¹⁸ Bir dae a bbeix, ca cirmelmel a gelir^d bei ho a sael Arbosobo yaa leil tiur, eine nga a mel yaa dder gelir bei goxr hoxltexr ddei bei pixl nr ssa. Arbosobo yar leil tiur teixl lei car, gelir bei nr goxr seir ca mel, yar dder gelir bei nr ssa a. ¹⁹ Gelir bei goxr bbeixsael bei nr goxr zzorbbeixlei nr zzi. Arbosobo miardal dae mel dax bei mae dae eil ddei lar nei zoxlyoxl.

²⁰ Ca cirddeir-hanga lei Arbosobo yar leil tiur car, yar azo bei su a mel hal mel sael a bei ze si a dder ddo a. ^e ²¹ Bir dae a bbeix, Arbosobo ni leil tiur car a ni zebol mu su arddeirnga a, zoxrzixr nr ssa. Nael arddolcar a ni armael lozza cexr arddeirnga a mel, ni dder halcar leil jiux dae a armael lozza loxr lol nia. ²² Seirpor yar leil tiur car a, yar zebol mu su arddeirnga a mel, eilcar Seirpor dder yar leil armael lozza lol a zuixl mel yar leil nr guaxr dae. Seirpor yar leil tiur car a, yar armael lozza su ca arddeirnga a mel, eilcar yar dder Zidu ddei zebol loxr a Zidu yar leil guaxr dae. ²³ Arbosobo mel yar Ssorzil ddei leil si lol a nia leil vae xixl lei a, yel nia ca mel ddei zebol bei ssi nr ddo. ²⁴ Arzzi-nimar arzzi-nimo mel, nia cirddeir-hanga lei Arbosobo nia leil tiur car a azo bei su a mel,

^d**7:18** Gelir bei a mel dder capor ddei sirbeixlddur olniuxniux zzi ddei caer teixl gger.

^e**7:20** Yar ddei yilsi mel dder bbeix Arbosobo yar leil tiur halcar a yar arsae nixixl goxr dae mel hherdder hal mel sael a seirseir bei ze si.

Arbosobo meixsaer qier leil hal mel sael a seirseir mel bei zei si nia.

²⁵ Yisu leil ddarzzi su capor nr zza seir ssormaer mel nei maerssor nr zza seir capor mel leil bbeix ci a nael, Seirpor ngo leil nia leil azo miardal ddu bbeix nr gger. Nael Seirpor ngo leil zoxlnixr, ngo leil yarzi koxlsseiddo ca arddeir loxr lol a mel, ngo dder ngo nixmox zzar xiar dae mel nia leil bbeix gger. ²⁶ Eilleix mel goxr sol, yel ngo zzir dae a, ca mel arsae goxr dae mel hal mel sael a goxr zei si a dder ddo. ²⁷ Ni maerssor zza ho arddeirnga a nael, yar leil li nia-nr-zzir bei nr ddo. Maerssor nr zza arddeirnga a nael, bbeix nia xiar nr ddo. ²⁸ Bir dae a bbeix, nia maerssor bbeix arddeirnga zzorbbeixlei, zuixl bei nr nga. Ssormaerleixl mel si leil fu gger arddeirnga zzorbbeixlei, zuixl bei nr nga. Nael capor maerssor zza su ca mel cirke goxr sol nia a, yel ngo nia leil eil mel goxr lol nia-nr-zzir.

²⁹ Arzzi-nimar arzzi-nimo mel, ngo nia leil bbeix gger, nixixl hormo arleixr nr zza a. Eine cirdae mel, nia maerssor zza su mel maerssor ddei leil lar xiar doxr dae nr ddo;^f ³⁰ cix a nge su ca mel nr nge su ca mel sael a nga nia; ggese su ca mel gge-nr-se su ca mel sael a nga nia; zzaegu vae wo su mel lei zzaegu mel leil lar xiar doxr dae nr ddo.⁹ ³¹ Middurbbor cirza-hanga eil mel mel maelmaerjjia lei mier var, yel nia middurbbor cirza-hanga eil mel leil lar sser milsi nr ddo.

³² Ngo mel nia cirza lei zoxrzixr ddu nr zza eine nga loxia. Maerssor nr bbeix seir capor mel Seirpor ddei miar mel leil lar zoxrzixr ssa, arsae bei a saelnei Seirpor leil ggese lol var xiar. ³³ Maerssor bbeix ho a mel middurbbor cirza-hanga mel leil zoxrzixr, arsae bei a saelnei armael

^f**7:29** Yar ddei yilsi mel dder armael ddei ake ddei leil lar guaxr milsi nr ddo, zabbar seirseir a Arbosobo leil miar bei gger nia.

⁹**7:30** Yar ddei yilsi mel dder arsae nga zzorbbeixlei Arbosobo leil miar bei gger nia.

maerssor leil ggese lol var xiar. ³⁴ Eine nga a mel, yar dder hormo maex nei xiar dae a. Capor nr zza ssormaer mel nei maermocir mel Seirpor ddei miar mel leil zoxrzixr, yaa ca cirddeir-lorbba Seirpor leil visser niazzir; nael si leil fu gger ho ssormaer mel mel middurbbor cirza-hanga eil mel leil zoxrzixr, arsae bei a saelnei armael capor leil ggese lol var xiar. ³⁵ Ngo ddar eil mel bbeix a mel nia leil guaxr gex dae nr nga, nia leil seir lol arddeir a. Ngo nia leil hoxr hoxr mel bei lol a mel, nia nixmox ddei dder kebal hal mel leil nr xiar, zabbar seirseir a Seirpor leil miar bei gger doxr cexr a.

³⁶ Bir dae a bbeix: capor ar ddei a ssormaer ar ddei leil meil ho a, yar zzir dae a yar ssormaer ddei leil yixrsixr nr zza lol var, ssormaer ddei lei koxltor ci a, capor ddei lei yar leil bbeix nia eine zzir dae arddeirnga a, yar dder ssormaer ddei leil bbeix ddo a. Eil ddei mel zuixl bei nr nga.

³⁷ Nael bir dae a bbeix, capor ddei nixmox zzar xiar ver ho a, arseir lei yar leil bixr su nr zza, yar lei armael leil guaxr ssei xie, eine nga a mel yar maerssor nr bbeix a lei seir. ³⁸ Bbeixleir-bbeixke mel, yar meil ho ssormaer hal ddei leil bbeix si lei a lei seir, nr bbeix a gielgiel seir.

³⁹ Capor ddei gol dae seir mel, maerssor ddei kebal capor zo ssi nr ddo; capor ddei si ho a mel maerssor ddei dder armael lozza a, capor zo box cexr, nael Seirpor leil ddarzzi su ca mel leil zo nia. ⁴⁰ Ngo zzir dae a, yar capor zo nr box arddeirnga a gielgiel seir. Ngo nia leil ddar eil mel biar gger a mel ngo zzir dae a Arbosobo ddei Xiu ddei ngo leil bbeix lol.

8

Bbex Leil Ziddu Mel Leil Biar

¹ Nia ngo leil biex goxr bbex leil ziddu mel leil biar ci a mel niul ca cirddeir-hanga lei saexl dae ho a. Nael niul saexl dae eil mel ca leil col lol var; niul ca leil perniar a larnai ca mel leil hhel du lei lol var. ² Arseir

zzir dae a yar mel cirza-hanga lei saexl ho a; nael nga zzael yar saexl mibbe mel lei yar halae nr saexl seir. ³ Arseir Arbosobo leil perniar arddeirnga a, Arbosobo yar leil saexl.

⁴ Bbex leil zi goxr zzorddu mel zzor eil ddei leil biar ci a mel niul lei saexl: bbex mel azo lei nr suax; Arbosobo mel cirddeir lar zza. ⁵ Kecal ca mel merlabbor bbeixsael middurbbor arbosobo cirke zza, seirpormar cirke zza, eine zzir dae bbeixarnar, ⁶ nael niul saexl, Arbosobo mel cirddeir lar zza. Yar mel dder cirza-hanga bei teixl lei su niul ddei merhhexr Arbbor ddei nga a; niul lei yar leil weix a gol dae. Seirpor lei cirddeir lar zza, hherdder Yisu Zidu nga a. Arbosobo yar leil ngol dae a cirza-hanga bei, niul lei yar leil koxl dae a gol dae.

⁷ Nael ca maelmaerjjia lei eil mel leil saexl ho a nr nga. Ca cirmemel a Yisu leil ddar-nr-zzi seir halleix bbex leil zi zzawo ho a, eilleix ci a lei yaa nixmox zzar hhel du lei nr xie, yel yaa zzir dae a yaa bbex leil zi goxr zzorddu mel zzor a gielgiel yaa armael leil nixmox zza sol lol. Yaa zzir dae a yaa Arbosobo leil sirzzi lol. ⁸ Zzorlabox mel leil koxl dae arddeirnga a mel, Arbosobo leil niul leil i lal lol nr cexr. Niul nr zzor arddeirnga a lei niul leil ke nr var, niul zzor arddeirnga a lei nixmox taex dax azo seirggiebbær nr zza.

⁹ Nael nia fadae nia. Nr nga a, nia armael lozza bei dae eil mel nixmox zzar hhel du lei nr xie arzzi-nimar arzzi-nimo hal mel leil zuixl bei lol leilei. ¹⁰ Bir dae a bbeix: zzor ddo bbeixsael zzor nr ddo nr saexl ca hal mel, nia Arbosobo ddei sulsaxlsu ca mel bbex lei zi ggie xi gga azo lerler zzor dae ggie mia arddeirnga a, yar nia leil i dae a nixmox vaervaermo zzor ssi var zzarmar? ¹¹ Nia ddei arzzi-nimar arzzi-nimo, nixmox zzar hhel du lei nr xie hal ddei lei Zidu yar leil weix a si a; nael nia Arbosobo ddei sulsaxlsu ca mel eine bei a mel, hherdder yar leil Zidu dax bbe kae lol. ¹² Nia zuixl eil mel bei a mel nixmox zzar hhel du lei

nr xie arzzi-nimar arzzi-nimo mel leil yaa zzir dae a bei nr ddo hal mel bei lol; nia yaa leil de dae a mel hherdder Zidu leil de dae a. ¹³ Yel ngo zzorlabox zzor a ngo ddei arzzi-nimar arzzi-nimo mel leil zuixl bei ssi lol var arddeirnga a, ngo dder cirse-cirsil lei bbex leil zi goxr hor mel nr zzor, nr nga a ngo ddei arzzi-nimar arzzi-nimo mel zuixl bei ssi leilei.

9

Yisu Miardal Dae Ca Mel Ddei Quexrlixl Mel

¹ Holbbaexl ngo armael lozza ca nr nga a ngo? Ngo Yisu miardal dae ca nr nga a ngo? Ngo niul ddei Seirpor Yisu leil mia nr goxr a ngo? Nia Arbosobo ddei cassor-worssor loxr a mel ngo Seirpor ddei ddar mel nia leil biar gger a nga arddeir a zzarmar? ² Nia Yisu leil ddarzzi su loxr eil ddei leil i dae a mel dder, ngo Yisu miardal dae ca nga a saexl ddo. Yel si dax bbeix ci a ngo Yisu miardal dae ca nr nga zzorbbeixlei, nael nia dax bbeix ci a mel nga a.

³ Ngo leil bota su ca mel leil ngo dder eine ddarkoxl. ⁴ Holbbaexl ngua Yisu Zidu ddei ddar seirseir mel ca leil biar gger a, ca mel ngua leil zol mi-nr-bbe, dax mi-nr-bbe a ngo? ⁵ Holbbaexl ngua Seirpor ddei nimar mel, nei Birdaexr, halae kebal Yisu miardal dae ca mel sael a Seirpor leil ddarzzi su ngua armael ddei maerssor ddei leil hier dax dae nr cexr a ngo? ⁶ Bbeixsael ngo nei Banaxrba larni armael ddei armael sulku ssi nia leir?

⁷ Arseir meixr mu ssi a halae armael zzorlabox vei dax dae bbeixleir? Arseir puxrto dae a, puxrto dae ggie saer mel nr zzor bbeixleir? Arseir acixl ya loxl a acixl ya baxr nr dda bbeixleir? ⁸ Ngo biar dae eil mel mel ca lar bbeix dae nr nga, Lixlfaxr leil lei eine bbeix dae zzarmar? ⁹ Moxrxi vaexr dae Lixlfaxr leil bbeix: “Niur mel ggieddei gga loxlmoxr leil jjiux

dae car, yar meir ddei leil neixl gex du lei nr ddo,^{9h} eine bbeix a. Holbbaexl Arbosobo niur mel leil lar perniar a ngo? ¹⁰ Ddar eil qier mel niul leil bbeix dae arddeir a zzarmar? Niul leil weix a vaexr arddeir a. Mi mo a loxlmoxr dae su nei loxlmoxr ddaexr su mel lei yaa li wo mibbe mel li niazzir a miar bei ssi. ¹¹ Ngua mel Yisu ddei ddar seirseir mel nia leil biar gger a, hherdder Arbosobo ddei Xiu ddei dax lei silmo mel nia dax xiu ji gger sael a nga, yel ngua nia dax zzorlabox ddalabox li zzorbbeixlei li mibbe mar! ¹² Kecal ca mel lei nia dax azo lerler li quexrlixl zza mel, ngua gielgiel li quexrlixl nr zza arddollei bbeixleir?

Nael ngua mel si leil Zidu ddei ddar seirseir mel leil dir lol nia-nr-zzir a, zeixleixr lei quexrlixl eil mel sser a nia dax azo li nr goxr, doxgoxleixr cirza-hanga lei ngua sser gex dae. ¹³ Holbbaexl Arbosobo ddei xi gga yar leil zi su ca mel, halmaex zzorddu mel zzor; Arbosobo leil zzeir seixl zi ggje yar leil zi su ca mel lei halmaex gga zzorddu mel bbe lel nia nr saexl a ngo? ¹⁴ Seirpor lei eine miardal goxr a; Seirpor ddei ddar seirseir noni su mel yaa leil biar gger su mel leil sser zoxr mel gger mibbe.

¹⁵ Nael ngo quexrlixl eil mel sser nr goxr. Eilcar a ngo ddar eil mel bbeix a mel nia leil eine bei loxia a bbeix nr nga. Ngo si zzorbbeixlei bir kecal ca mel ngo kuar dae eil mel su si leil seir leixl. ¹⁶ Ngo Yisu ddei ddar seirseir mel ca leil biar gger ssi a mel Arbosobo ngo leil ssi lol arddeir a. Yel ngo kuar ddu nr zza. Ngo nr ssi arddeirnga a, ngo dder zoxr a. ¹⁷ Ngo armael si leil biar gger ssi ggese arddeirnga a mel, ngo dder ngo li wo mibbe mel li wo ddo a; nael ngo ssi gge-nr-se arddeirnga zzorbbeixlei, Arbosobo ngo leil ssi lol a mel, ngo nr ssi goxr nr ddo. ¹⁸ Eine nga a, ngo li wo mibbe mel azo a neil? Hherdder ca mel zzirbae nr ddux lei Yisu ddei ddar seirseir mel noni wo eil ddei nga a. Yel ngo ca mel leil Yisu

^h9:9 Ddar eil qier Semixljil Sul 25:4 leil vaexr dae. Yoxrtaexl su ca mel loxlmoxr ddaexr a mel ggieddei gga kar dae a niur leil jjiux lol.

ddei ddar seirseir mel biar gger car ngo ddei quexrlixl mel nr sser.ⁱ

¹⁹ Ngo mel armael lozza, arseir lei ngo leil guaxr nr gex dae bbeixarnar, nael ngo halae ca maelmaerjjia ddei zebol sael a nga. Eine nga a mel ngo dder ca cirke leil Seirpor leil ddarzzi lei lol cexr a. ²⁰ Ngo Yoxrtaexl su ca mel dax cirgo a hher dae a mel hherdder Yoxrtaexl su ca mel sael a bei. Eine nga a mel ngo dder yaa leil Zidu leil ddarzzi lol cexr. Moxrxi ddei Lixlfaxr mel ngo leil guaxr nr gex dae bbeixarnar, nael ngo Moxrxi ddei Lixlfaxr dax bei mae su ca mel dax cirgo a hher dae car, ngo lei Lixlfaxr dax bei mae dae. Eine nga a mel ngo dder yaa leil Zidu leil ddarzzi lol cexr. ²¹ Ngo Yoxrtaexl su ddei Lixlfaxr nr zza su ca mel dax cirgo a hher dae car Lixlfaxr eil ddei ngo leil guaxr nr gex dae lol. Eine nga a mel ngo dder yaa lei Zidu lei ddarzzi lol cexr. Nael Arbosobo ddei Lixlfaxr hherdder Zidu ddei Lixlfaxr mel ngo leil guaxr gex dae. ²² Ngo nixmox hhel du lei nr xie ca mel dax cirgo a hher dae car a ngo lei yaa sael a bei. Eine nga a mel ngo yaa leil Zidu leil ddarzzi lol cexr. Arddolyox ca dax cirgo a hher mel ngo dder arddolyox ca mel sael a bei, arsaе nga zzorbbeixlei ngo ca armel leil Arbosobo leil ddarzzi lol a yaa leil jiuxl wo lol nia. ²³ Ngo cirza-hanga eil mel bei a mel Yisu ddei ddar seirseir mel ca leil biar gger niazzir a nga arddeir a. Yel ca mel ngo dax cirgo a Yisu ddei ddar seirseir mel leil ddarzzi a cirza-hanga seirseir li wo ddo.

²⁴ Beix birvul ggie halmaex gga beix ssi su ca mel cirke zza, nael beix leixl ho a azo lerler li wo ddo ca cirddeir lar zza, holbbaexl nia nr saexl a ngo? Eine nga a nia lei yaa sael a zabbar seirseir a beix ssi nia hherdder zabbar seirseir a Arbosobo leil visser, yel nia lei Arbosobo nia leil gger mel li wo ddo.

²⁵ Beix birvul su ca maelmaerjjia lei zabbar seirseir a beix, armael leil

ⁱ**9:18** Barloxr mel yaa leil miardal a yar leil zzorddu, ddaddu, sserddu gger lol cexr, nael yar eine nr bei.

guaxr ssei xie. Yaa eine bei a mel oldde lei ddexrlabox xiaxr var hal ddei lar li wo ddo. Nael niul Seirpor Yisu dax bei mae dae a mel zzirmar oldde leil ddexrlabox cirse-cirsil lei xiaxr nr var hal ddei li wo ddo.²⁶ Yel ngo beix dae car, arddolmaex beix mal nia mel ngo saexl dae, ngo yoxl zzi deil su mel sael a cirtaex-hanga lei deil ma xie.²⁷ Ngo mel armael leil zabbar seirseir a guaxr gex dae a, ngo ggecir ddei leil ngo ddar no lol. Nr nga a mel ngo si leil ddar seirseir mel biar gger bbeixarnar, ngo armael zzael zzirmar oldde leil ddexrlabox hal ddei li wo nr ddo a.

10

Bbex Leil Zi Nr Ddo

¹ Arzzi-nimar arzzi-nimo mel, ngo nia leil halleix niul ddei porpor mel zico woxrke ssi, neixvi gga gger eil mel holcir dae lol nia.^j ² Yaa maelmaerjia lei zico gga nei neixvi gga sexlsir a Moxrxi dax mae dae a. ³ Yaa maelmaerjia lei Arbosobo yaa leil gger merlabbor zei lei zzorladox mel zzor a;^k ⁴ Arbosobo yaa leil da ajjix mel dda a.^l Ajjix eil mel mel hherdder Arbosobo yaa leil gger legelbbe vaervaer hal taex gga pe teixl lei. Legelbbe hal taex mel dder Zidu leil bbeix. Yaa mipaerbbae gga hher dae car a Zidu yaa dax mae dae. ⁵ Nael ca eil mel gga cirke a mel Arbosobo leil gge-nr-se lol, yel yaa dder mipaerbbae gga si pixl dae a. ⁶ Cirza-hanga eil mel mel, hherdder niul leil yaa sael a yarzi nr seir hal mel leil tuxr ssi nr ddo bbeix gger arddeir a. ⁷ Halae yaa ca cirmelmel sael a bbex mel leil zi, bbex mel leil oldde textl eine bei nr ddo. Hherdder Arbosobo Ddei Sul ber leil vaexr goxr mel sael a nga bbeix: “Yirsaexllixl

^j10:1 Cu'aezixr Sul 13:17–14:31 leil biar dae.

^k10:3 Cu'aezixr Sul 16 leil biar dae.

^l10:4 Cu'aezixr Sul 17:1-7 nei Mixrsuxljil Sul 20:1-13 leil biar dae.

su cassor-worssor mel cux dae a zzae zzorzzor-ddadda, ha du lei a zzae nrbba nrbba gaxgor,^m eine bbeix a.⁸ Niul lei yaa ca cirmelmel sael a capor ssormaer zzi dax nrbba nrbba bei nr ddo. Yaa mel cir ni dder ca nrmeixr-sodu si a.ⁿ⁹ Halae yaa ca cirmelmel sael a Zidu leil sixr i nr ddo. Yaa mel yar leil sixr i a yaa leil dder sae kexl zil gger a.^o¹⁰ Nia yaa boxyox su ca hal mel sael a boxyox nr ddo. Yaa mel boxyox a ca leil bei zil gger su tisir ddei dder yaa leil bei zil gger a.^p

¹¹ Yaa cirza-hanga eil mel pex dae a mel, ca mel leil yaa sael a hane bei nr ddo saexl lol. Yaa pex dae hal mel halae Arbosobo Ddei Sul ber leil lei vaexr zei lei a, niul nixixl maelele gga goxr dae ca mel leil bbeix gger.

¹² Yel armael zzir dae a ngier ver xie ca mel fadae nia; nr nga a de zei lei. Hherdder armael zzir dae a vever a Yisu leil ddarzzi dae ca hal mel fa dae nia; nr nga a zuixl bei ssi leilei.¹³ Nia cirza-hanga pex dae a nia leil sixr i dae eil mel mel ca mel zoxlzoxl a pex dae var hal mel lar nga. Arbosobo leil mel ddarzziddo. Yar nia leil nia ssessei nr xie hal mel pex dae lol nr var. Cirza-hanga hal mel nia leil sixr i dae car a lei, yar nia leil jjiimo ar zex mul gger var, yel nia leil ssessei xie lol.^q

¹⁴ Yel ngo perniar dae arzzi-nimar arzzi-nimo mel, nia bbex leil zi ssi nr ddo; hal mel dax naer lei naer nr ddo.¹⁵ Nia mel xiar saexl. Ngo ddar bbeix dae mel hoxrhoxr nr hoxr mel nia armael xiar ssi ddo.¹⁶ Niul cirgo a beizi hal ddei dda car, Seirpor leil nawo a mel hherdder Zidu niul leil weix a sirnilni ddux a holcir dae zzarmar? Niul cirgo a aba pir ngaxl kae

^m**10:7** Cu'aezixr Sul 32:6 leil vaexr dae.

ⁿ**10:8** Mixrsuxljil Sul 25:1-9 leil biar dae.

^o**10:9** Mixrsuxljil Sul 21:5-6 leil biar dae.

^p**10:10** Mixrsuxljil Sul 14:1-38 nei 16:41-50 leil biar dae.

^q**10:13** Arseir ca leil sixr i a, yar leil zuixl bei lol niazzir dae a mel, Arbosobo yar leil beijjiu a zuixl nr bei ssi lol var.

a zzor car, Seirpor leil nawo a mel hherdder Zidu niul leil weix a yar ddei ggecir nr li holcir dae zzarmar?^{s 17} Niul ca cirke a bbeixarnar, aba mel cir pir a zza, maelmaerjjia lei aba eil pir bbe leil. Yilsi mel dder niul ggecir cir ddei a zza sael a nga.^{t 18} Nia Yirsaexllixl su ca mel leil arleixr i: yaa Arbosobo leil zi goxr zzorddu mel zzor a mel dder, yaa lei Arbosobo leil zzeir seixl zi ggie yar leil zi su mel dax cir piar a bei a.

¹⁹ Ngo azo yilsi bbeix dae arddeir a neil? Holbbaexl bbex leil zi dae mel naxrcixl bbeix a ngo? Bbeixsael bbex mel yarzi Arbosobo a bbeix a ngo?

²⁰ Ngo eine bbeix nr nga mar! Ngo ddei yilsi ddei mel dder bbeix, Arbosobo leil ddar-nr-zzi su ca mel neir mel leil zi lalnga, Arbosobo leil zi nr nga.^u Ngo nia leil neir dax cir piar a bei lol nia-nr-zzir.

²¹⁻²² Holbbaexl niul mel Seirpor leil sirzzi lol ddo a ngo? Niul bir yar leil ddo leixl a ngo? Nia Seirpor ddei beizi lei dda yoxl neir ddei beizi lei dda eine bei nr ddo. Seirpor ddei aba lei zzor yoxl neir leil zi goxr zzorddu mel lei zzor eine bei nr ddo.

Yisu Leil Ddarzzi Su Armael Lo Zza

²³ Ca cirmelmel a bbeix: “Azo lei bei cexr” eine bbeix, nael maelmaerjjia lei ca dax seirggiebbær zza nr nga. Ca cirmelmel a bbeix: “Azo lei bei cexr” eine bbeix, nael maelmaerjjia lei ca leil seir dax lol var nr nga.

²⁴ Arseir lei armael ddei seirggiebbær xiar nr ddo, kebal ca ddei seirggiebbær xiar nia.

^s**10:16** Luxljia Sul 22:14-20 nei Gerlixrdo Sul Vaexr Beil 11:23-26 leil biar dae.

^t**10:17** *niul ggecir cir ddei a zza sael a nga* Yilsi mel dder Yisu leil ddarzzi su yar dax hher ji dae.

^u**10:20** Semixljil Sul 32:17 leil vaexr dae.

²⁵⁻²⁶ “Middurbbor ddei nei middurbbor cirza-hanga lei Seirpor ddei a.”^v
Yel ha hor vur ggje vur dae hor mel mel nia vae si lei a zzor a dder ddo a;
nia nixmox zzar eine xiar hane xiar a si leil biex ssi nr ssa.

²⁷ Bir dae a bbeix, Yisu leil ddar-nr-zzi su ca arddeir a nia leil zzo qie a,
nia ssi yuex arddeirnga a mel, yar nia meixsaer qier leil azo dol gger mel
nia zzor a dder ddo, nia nixmox zzar eine xiar hane xiar a, yar leil biex
nr ssa. ²⁸ Nael ca arddeir a nia leil bbeix: “Eil mel mel bbex leil zi goxr a,”
eine bbeix gger arddeirnga a mel, nia dder nia leil bbeix gger su ca hal
ddei leil weix nei yar leil nixmox zzaso lol a zzor nr ddo. ²⁹ Ngo nia
armael nixmox ddei leil bbeix nr nga a nei, nia leil bbeix gger su ca hal
ddei nixmox ddei leil bbeix arddeir a. Nael ca mel “Ngo azo zzor mel ngo
lozza, si nixmox zzar arsae xiar mel ngo dax azo guaxrzoxr? ³⁰ Ngo
Arbosobo leil nawo ho a sael zzor mel, arsaenga a kebal ca mel halae
ngo zzorlabox eil mel zzor a ngo leil bbeix vuxryixr leir?” eine biex var.

³¹ Yel nia zzorzzor-ddadda bbeixsael azo bei zzorbbeixlei Arbosobo leil
middux lol a bei ssi nia. ³² Nia Yoxrtaexl su ca, Xilaxl su ca, bbeixsael
Arbosobo ddei jiaxlhuixl gga ca mel leil zuixl bei lol nr ddo. ³³ Nia ngo
sael a nga nia. Ngo mel azo bei lei ca cirddeir-hanga leil ggese lol,
armael ddei seirggiebbær xiar nr nga a nei, ca cirddeir-hanga ddei
seirggiebbær xiar, yel yaa leil Yisu leil ddarzzi lol a yaa leil jiuxl wo lol.

11

¹ Nia ngo dax bei mae dae nia, hherdder ngo Zidu dax bei mae dae mel
sael a nga.

Jiaxlhuixl Gga Arsae Bei Nia

² Ngo nia leil kuar gger a mel, nia azo bei lei ngo leil holcir dae nei ngo

^v10:25-26 Sipi Sul 24:1 leil vaexr dae.

nia leil biar gger goxr mel dax bei mæ doxr dae a nga arddeir a.

³ Nael ngo nia leil saexl lol nia, Zidu mel capor ddei oldde a; capor mel ssormaer ddei oldde a; Arbosobo mel Zidu ddei oldde a.^w ⁴ Ha capor mel Arbosobo dax ddar biar bbeixsael Arbosobo ddei ddar mel ca leil biar gger car, oldde ddei leil bbe gex dae arddeirnga a mel, yar ddei oldde hherdder Zidu leil seixlda lol a. ⁵ Nael ha ssormaer mel Arbosobo dax ddar biar bbeixsael Arbosobo ddei ddar mel ca leil biar gger car, oldde ddei leil bbe nr gex arddeirnga a mel, yar dder olce mel cox pixl gger ho sael a nga, yel yar dder yar ddei oldde hherdder yar capor ddei leil seixlda lol a. ⁶ Ssormaer mel oldde ddei leil bbe nr gex arddeirnga a mel dder, olce mel ddaexr teixl nia. Yaa olce ddaexr pixl nei cox pixl a seixlda arddeirnga a mel dder oldde ddei leil bbe gex dae nia. ⁷ Capor mel oldde ddei leil bbe gex nr ddo. Yar mel Arbosobo ddei yaxlzi ddei nga a; halae yar leil i dae a dder Arbosobo middux saexl ddo, nael ssormaer ddei leil i dae a dder yar capor middux saexl ddo.

⁸ Cirza-hanga bei beil car mel, capor ssormaer dax ddux lei nr nga, ssormaer capor dax ddux lei. ⁹ Halae capor mel mel ssormaer leil weix a bei teixl lei nr nga, ssormaer mel nael capor leil weix a bei teixl lei arddeir a. ¹⁰ Yel ssormaer mel capor mel leil nei tisir mel leil weix a oldde ddei leil bbe gex dae nia. Eine nga a mel dder ssormaer mel capor ddei ddar no i teixl lei ddo.

¹¹ Nael Seirpor dax cir piar a bei su mel mel, ssormaer lei capor leil sser zoxr, capor lei ssormaer leil sser zoxr. ¹² Halcar a mel ssormaer capor dax ddux lei beil, giedae nael ssormaer mel leil sser dae a capor mel leil xiu teixl lei, nael cirza-hanga eil mel maelmaerjjia lei Arbosobo bei teixl lei. ¹³ Nia arleixr xiar, ssormaer mel Arbosobo dax ddar biar a oldde ddei

^w**11:3** Yilsi mel dder Yisu mel capor leil guaxr cexr, capor mel ssormaer leil guaxr cexr, Arbosobo mel Zidu leil guaxr cexr.

leil bbe nr gex dae a hoxr hoxr? ¹⁴ Nia lei saexl, capor mel olce darsisi dol dae arddeirnga a mel, yar dder seixldaddo. ¹⁵ Nael ssormaer mel olce darsisi dol dae a mel igax zae, Arbosobo ssormaer mel leil olce darsisi ner lol a mel yaa leil oldde taex leil bbe gex dae lol arddeir a. ¹⁶ Nael arseir ngua dax leiddur eil ddei zex niazzir arddeirnga a, Arbosobo dax ddar biar car nei yar ddei ddar biar gger car ngua mel kebal azo leiddur nr zza, Arbosobo ddei jiaxlhuixl cirddeir-hanga gga lei nr zza, yel azo zexddu nr zza.

Seirpor Ddei Beizi Arsae Dda, Yar Ddei Aba Arsae Zzor

¹⁷ Nia cirgo a jiaxlhuixl gga hher dae car nia dax seirggiebbær nr zza, nia leil ke lalnga, yel eilcar ngo nia leil miardal ddar mel mel nia leil kuar gger nr nga. ¹⁸ Ngo bbejjiur a bbeix nia ca mel zzi dax cirgo a jiaxlhuixl gga hher dae car circir-circir bbe mal. Ddar eil mel ngo ardoxr ddarzzi. ¹⁹ Nia ca mel gga arsaebeilei circir-circir bbe su armel zza var. Eine nga a mel dder Arbosobo ca arddol mel leil i du saexl ddo! ²⁰⁻²¹ Nia cirgo a jiaxlhuixl gga hher dae a Seirpor ddei zzo var zzor car a, xilmeir lei su mel zzae xilmeir zzor, zzi leil nr xia. Cirmelmel a zzae meixr dae, cirmelmel a zzae zzibbaer lei dda yixr. Yel nia eine bei a mel Seirpor leil holcir dae nr nga. ²² Holbbaexl nia ake zzor ggie nr zza dda ggie nr zza a ngo? Bbeixsaer nia Arbosobo ddei jiaxlhuixl leil i ze i a, casolssor mel leil seixlda lol leir? Ngo nia leil arsae bbeix nia neil? Ngo nia bei dae mel leil kuar gger nia a ngo? Ngo arsaebeilei nia leil kuar gger nr var.

²³ Ngo nia leil biar gger goxr eil ddei mel Seirpor ngo leil mul gger arddeir a. Yoxrdaxl, Seirpor Yisu leil vur lel hal cir xixlmei, Yisu aba vei dae a, ²⁴ Arbosobo leil nawo ho a ngaxl kae a bbeix: “Eil ddei mel ngo ddei ggecir ddei nga a; nia leil weix a si nia. Nia eil ddei zzor a ngo leil holcir dae nia.” ²⁵ Zzor teixl ho yoxl beizi ddei caer du lei a bbeix: “Eil bei mel ngo ddei sirnilni a. Merhhexr Arbbor sirnilni eil mel sser a yar ddei

cassor-worssor dax bbeix har zaxr dae yarsixl ddei nga a. Nia arddolcar eil bei dda a lei ngo leil holcir dae nia,” eine bbeix a. ²⁶ Nia arddolcar aba eil ddei zzor, arddolcar eil bei dda a mel dder ca mel leil Seirpor niul leil weix a si biar gger a. Seirpor jjixr lei zzezze lei nia eine bei zei si nia.

²⁷ Yel arseir nga zzorbbeixlei, yar nrbba nrbba Seirpor ddei aba zzor, Seirpor ddei hal bei dda arddeirnga a mel, hherdder Seirpor ddei ggecir nei Seirpor ddei sirnilni leil i nr du zuixl bei a. ²⁸ Ca mel hoba zabbar seilseir a arsae lerler bei cox i a cexrssexl nia, saelnei aba zzor ddo, hal bei dda ddo. ²⁹ Ca mel zzor car dda car Seirpor ddei ggecir ddei leil i nr du a mel,^x hherdder armael ddei armael zuixl dixl gger a. ³⁰ Yel nia ca mel gga mel ggecir naexlbix su nei no su lei cirke zza, halae si zil su lei armel zza. ³¹ Nael niul zzor car nei dda car, armael arsae lerler bei cox goxr a cexrssexl a mel, niul leil dder serpaxl nr var. ³² Seirpor niul leil ser a mel yar niul leil hoxrhoxr nr hoxr mul gger arddeir a. Nr nga a mel niul leil dder middurbbor ca mel dax cirgo a zuixl dixl gger nia. ³³ Yel arzzi-nimar arzzi-nimo mel, nia cirgo a jiaxlhuixl gga hher dae a zzor car mel zzi leil xia dae nia. ³⁴ Nia arseir zzo meixr arddeirnga a mel hoba ake zzor zaxr. Nr nga a nia zzi dax cirgo a jiaxlhuixl gga hher dae car Seirpor leil de dae a, yar nia leil zuixl dixl gger leilei.

Kebal hal mel arsae bei nia nael ngo lei a sael nia leil bbeix gger.

12

Arbosobo Ddei Xiu Ddei Niul Leil Seirseir Mel Meixl Gger

¹ Arzzi-nimar arzzi-nimo mel, Arbosobo ddei Xiu ddei niul leil seirseir meixl gger dae mel ngo nia leil saexl lol niazzir. ² Nia lei saexl, nia halae

^x**11:29** *Seirpor ddei ggecir ddei leil i nr du a mel* Yilsi mel dder yaa zzor car dda car kebal Yisu leil ddarzzi su ca mel leil i nr du.

Seirpor leil nr saexl seir car mel nia si ddar no, si nia leil fur si a ddar te nr var bbex mel leil zi ssi. ³ Yel ngo nia leil saexl lol nia, ha Arbosobo ddei Xiu ddei ca nixmox zzar hher ji dae a mel, ca mel dder Yisu leil hie no nr var; ha Arbosobo ddei Xiu ddei ca nixmox zzar hher nr ji dae arddeirnga a mel, ca mel dder “Yisu mel Seirpor a,” bbeix nr var.

⁴ Ca leil seirseir meixl gger dae mel hormo yoxr nei zza, nael maelmaerjia Arbosobo ddei Xiu ddei meixl gger a. ⁵ Jiaxlhuixl gga mel cirza-hanga miar bei su lei zza, nael yaa maelmaerjia lei Seirpor cirddeir leil lar bei gger. ⁶ Bbesur mel hormo yoxr nei zza, nael ca maelmaerjia leil bbesur zza lol su Arbosobo mel cirddeir lar zza.

⁷ Arbosobo ddei Xiu ddei ca leil bbesur zza lol a mel ca mel zzicarzzi leil seir lol cexr. ⁸ Ca cirddeirddeir leil a nael Arbosobo ddei Xiu ddei yar leil yarzi olnoolddu ddar hal mel te var lol, ca cirddeirddeir leil a nael Arbosobo ddei Xiu ddei yar leil Arbosobo leil biar dae mel saexl lol.

⁹ Yoxl cirddeirddeir leil a nael Arbosobo ddei Xiu ddei yar leil Arbosobo leil yarzi sael ddarzzi lol; halae cirddeirddeir leil a nael Arbosobo ddei Xiu ddei yar leil ca leil no ggukor gger lol. ¹⁰ Cirddeirddeir leil a nael ca mel bei nr var ddoddomo hal mel bei var lol, cirddeirddeir leil a nael xiezi^y bei lol, cirddeirddeir leil a nael Arbosobo ddei Xiu bbeixsael neir ddei xiu bbe kae saexl lol, cirddeirddeir leil a nael ca mel noni wo nr xie ddar hormo yoxr nei te var lol, cirddeirddeir leil a nael yaa te dae ddar eil mel arddolyox yilsi a ca mel leil bbeix gger var lol. ¹¹ Eilzzu maelmaerjia lei Arbosobo ddei Xiu ddei ca leil bei bbesur zza lol arddeir a. Yar armael xiar dae mel dax zox dae a ca cirddeir-hanga leil gger.

Ggecir Cirddeir Lar Zza, Nael Cirza-hanga Lei Niar Dae

^y**12:10** *xiezi* Xiezi mel hherdder Arbosobo yar leil bbeix gger ddar mel ca mel leil biar gger.

¹² Hherdder ggecir ddei sael a nga. Ggecir ddei leil ciryoxr-hanga lei niar dae bbeixarnar ggecir mel cirddeir a nga. Zidu ddei ggecir hherdder yar ddei jiaxlhuixl lei dder eil mel sael a nga.^z ¹³ Niul Yoxrtaexl su ca bbeixsael Xilaxl su ca, armael lozza su ca bbeixsael zebol mu su ca zzorbbeixlei, maelmaerjjia Arbosobo ddei Xiu ddei leil koxl dae a sexlsir a, ggecir cirddeir a loxr, hherdder Yisu dax cir piar a bei a. Arbosobo ddei Xiu ddei niul cirddeir-hanga dax lei hher ji dae a.

¹⁴ Ggecir ddei leil mel ciryoxr a niar dae nr nga, ciryoxr-hanga lei niar dae. ¹⁵ Bir dae a bbeix qihher ddei bbeix: “Ngo mel leixrhher nr nga, ggecir ddei leil niar dae nr suax,” eine bbeixarnar, nael yar halae ggecir ddei leil niar dae. ¹⁶ Bir dae a bbeix nolba ddei bbeix: “Ngo mel meixddur nr nga, ggecir ddei leil niar dae nr suax,” eine bbeixarnar, nael yar halae ggecir ddei leil niar dae. ¹⁷ Bir dae a bbeix ggecir cirddeir-lorbba lei meixddur lillil a nga a mel arsae noni cexr bbeixleir? Bir dae a bbeix ggecir cirddeir-lorbba lei nolba lillil a nga a mel arsae ner cexr bbeixleir? ¹⁸ Nael Arbosobo armael xiar dae mel dax zox dae a, niul ggecir ddei leil arddolmaex arddolyox niar nia mel dder halmaex niar dae lol. ¹⁹ Bir dae a bbeix ggecir cirddeir-lorbba lei ciryoxr a niar dae arddeirnga a mel, arsae ggecir arddeir suax cexr bbeixleir? ²⁰ Nael ggecir ddei leil ciryoxr-hanga lei niar dae bbeixarnar, ggecir mel cirddeir a nga.

²¹ Meixddur ddei leixrhher ddei leil bbeix: “Ngo ni leil sser nr zoxr,” bbeix nr cexr. Oldde ddei lei qihher ddei leil bbeix: “Ngo ni leil sser nr zoxr,” bbeix nr cexr. ²² Yarzi bbeix, ggecir ddei leil niar dae mel ca i dae a ardoxr naexlbix hal mel gielgiel nr niar goxr nr ddo mel nga a. ²³ Ggecir ddei leil niar dae a hormolsael zoxl-nr-yoxl hal mel gielgiel yaa leil yarzi

^z**12:12** *Zidu ddei ggecir hherdder yar ddei jiaxlhuixl lei dder eil mel sael a nga. Zidu ddei jiaxlhuixl ca yarzi miur zza. Ca eil mel mel armael ddei bbesur zza.*

i du; ggecir ddei leil niar dae a seixldaddo hal mel gielgiel yarzi zae pia mel veixr dae a i zae lol. ²⁴ Ggecir ddei leil niar dae a zaelzae hal mel mel bei zae dax gger nr ssa. Arbosobo mel niul ggecir ddei leil arddolmaex azo niar nia mel azo niar lol, zoxl-nr-yoxl hal mel leil gielgiel i du lol.

²⁵ Eine nga a mel ggecir cir ddei leil ciryoxr-hanga niar dae a mel dder bbe kae nr cexr, zzicarzzi leil beijjiu dax dae cexr. ²⁶ Ggecir leil niar dae mel ar yoxr goxr sol arddeirnga a mel, maelmaerjjia lei cirgo a goxr sol dae. Ggecir leil niar dae mel ar yoxr middux a mel, maelmaerjjia lei cirgo a ggese.

²⁷ Nia maelmaerjjia cirgo a nga a mel dder Zidu ddei ggecir loxr a, cirddeir-hanga lei yar leil niar gex dae a. ²⁸ Arbosobo jiaxlhuixl gga tiur har dae ca mel mel, hoba nael Yisu miardal dae ca mel, giedae nael xiezi mel, nael yoxl sulmulsu mel, ca mel bei nr var ddoddomo bei su mel, halae Arbosobo dax ddar biar a ca leil no ggukor gger su, yoxl ca leil beijjiu su, cirza-hanga miar guaxr su, ca mel noni wo nr xie ddar hormo yoxr nei te su. ²⁹ Holbbaexl ca maelmaerjjia lei Yisu miardal dae ca a ngo? Maelmaerjjia lei xiezi a ngo? Maelmaerjjia lei sulmulsu a ngo?

Maelmaerjjia lei ca mel bei nr var ddoddomo bei su a ngo?

³⁰ Maelmaerjjia lei ca leil no ggukor gger su a ngo? Maelmaerjjia lei ca mel noni wo nr xie ddar te su a ngo? Maelmaerjjia lei ca mel noni wo nr xie ddar hal mel arddolyox yilsu a ca mel leil biar gger su a ngo? ³¹ Nia mel zabbar seilseir a Arbosobo ddei Xiu ddei nia leil gger bbesur seir zzir hal mel leil qiuxr nia.

Eilcar a ngo nia leil arsae bei a saelnei seir zzir hal mel bei mul gger nia.

13

Zzicarzzi Leil Perniar

¹ Bir dae a bbeix, ngo hormo yoxr ca ddei ddar lei te var, halae tisir ddei ddar lei te var zzorbbeixlei, nael ngo ca leil per-nr-niar arddeirnga a mel, ngo ddar bbeix dae mel hherdder sirgo deil dae a yarzi nolba bbar hal mel sael a nga. ² Bir dae a bbeix, ngo xiezi sael a Arbosobo ddei ddar mel ca leil biar gger bbesur zza, yel Arbosobo ca leil nr saexl lol hal mel maelmaerjgia lei ngo saexl, cirza-hanga sul lei saexl; halae Arbosobo leil yarzi sael ddarzzi a, worga lei bapixl var zzorbbeixlei, nael ngo ca leil per-nr-niar arddeirnga a mel, ngo dder azo lei nr suax. ³ Bir dae a bbeix, ngo ddei cirza-hanga mel maelmaerjgia lei casolssor leil gger, yoxl ngo ddei olga ddei lei nr li, ca leil cu pixl gger lol zzorbbeixlei,^a nael ngo ca leil per-nr-niar arddeirnga a mel dder ngo dax seirggiebbær nr zza.

⁴ Ca leil perniar a mel arddolcar ci lei ssertexr zza, ca leil zoxlnixr, si leil nix-nr-nox, armael ddei armael nr kuar, nr col, ⁵ seixldaddo hal mel nr bei, armael ddei seirggiebbær nr qiuxr, ca leil sirzzi nr so, si bei cox mel leil holcir nr doxr dae, ⁶ nr seir hal mel leil li-nr-zoxr, yarzi hal mel leil lar lizoxr. ⁷ Ca leil perniar a mel cirza-hanga lei sser gex dae, ddarzzi doxr dae, cirza-hanga lei seirseirmo nga loxia, cirza-hanga lei ssertexr zza.

⁸ Ca leil perniar a mel perniar nor nixixl nr zza. Nael arddolcar mel Arbosobo ddei ddar ca leil biar gger bbesur ddei mel nor nixixl zza, noni wo nr xie ddar hormo yoxr te bbesur ddei lei te nor nixixl zza, cirza-hanga sul saexl bbesur hal ddei lei nr zza var. ⁹ Niul eilleix saexl dae eil mel lei saexl gaxzi nr jjia; xiezi mel ca leil biar gger dae mel lei biar gger gaxzi nr jjia. ¹⁰ Nael seirceix-seirmaer gaxzi hal ddei lei ci a

^a**13:3** *yoxl ngo ddei olga ddei lei nr li, ca leil cu pixl gger lol zzorbbeixlei* Arbosobo Ddei Sul cirberber a bbeix: “yoxl ngo ddei olga ddei lei nr li, armael leil kuar gger cexr bbeixarnar,” eine bbeix.

mel,^b eil mel dder nr zza var. ¹¹ Ngo aniuessor tor halleix mel ddar te lei aniuessor lesel, nixmox zzar xiar dae mel lei aniuessor lesel, azo lerler bei ssi niazzir dae mel lei aniuessor lesel. Eilboxl ngo ca vaer loxr ho a mel hherdder aniuessor lesel hal mel piar pixl gger ho a. ¹² Eilleix niul cirza-hanga eil mel leil i dae a mel hherdder jixlzi yarli ddei gga i dae sael a nga, i lei i nr sei, nael hane ci a mel, niul dder zzicarzzi xilmeir leil ngier dae sael a nga i sei a. Ngo eilleix saexl dae mel mel saexl gaxzi nr jjia, hane ci a mel saexl gaxzi jjia a, hherdder Seirpor ngo leil saexl gaxzi mel sael a nga.

¹³ Nael Arbosobo leil ddarzzi, seirseir nga loxia, ca leil perniar, eilleix zza dae eil so yoxr gga zoxlyoxl zzir ddei mel dder ca leil perniar ddei nga a.

14

Zeixleixr Arbosobo Ddei Xiu Ddei Ca Leil Seirseir Meixl Gger Dae Mel Leil Biar

¹ Nia ho bei ho ca leil perniar dax ssi nia. Nia Arbosobo ddei Xiu ddei ca leil seirseir meixl gger dae mel li wo loxia nia. Xiezi bei a Arbosobo ddei ddar mel ca leil biar gger bbesur hal mel gielgiel li wo loxia nia. ² Ca mel noni wo nr xie ddar hormo yoxr nei te su hal mel mel ca dax te dae nr nga, Arbosobo dax te dae arddeir a. Yaa ddar te dae mel arseir lei noni wo nr xie. Yaa mel Arbosobo ddei Xiu ddei leil koxl dae a, ca mel nr saexl hal mel biar dae arddeir a. ³ Nael xiezi mel Arbosobo ddei ddar ca leil biar gger a, yaa ca leil hhel du lei lol; ca leil nixmox zzaso lol; ca leil quex. ⁴ Ca mel noni wo nr xie ddar hormo yoxr nei te su hal mel mel armael leil hhel du lei lol; Arbosobo ddei ddar mel ca leil biar gger su xiezi mel mel

^b13:10 Seirceix-seirmaer gaxzi hal ddei mel dder Yisu nga a.

jiaxlhuixl gga ca mel leil hhel du lei lol. ⁵ Ngo, nia ca cirddeir-hanga lei ca mel noni wo nr xie ddar hormo yoxr nei te var loxia, nael ngo gielgiel nia Arbosobo ddei ddar mel ca leil biar gger su xiezi bei loxia. Ddar hormo yoxr te dae hal mel azo yilsi a bbeix teixl gger lei su ca nr zza arddeirnga a mel, jiaxlhuixl gga ca mel leil hhel du lei lol nr cexr. Eine nga a mel halae Arbosobo ddei ddar mel ca leil bbeix gger su xiezi mel zzi nr zza.

⁶ Arzzi-nimar arzzi-nimo mel, ngo nia dax halmaex ssi a ca mel noni wo nr xie ddar hormo yoxr nei te, nael ddar eil mel azo yilsi a nia leil bbeix nr gger, ngo dder nia dax azo seirggiebbær nr zza. Ngo Arbosobo ngo leil saexl lol mel, Arbosobo ddei ddar mel nei nia leil mul ggerlabox mel nia leil bbeix gger a saelnei nia dax seirggiebbær zza. ⁷ Bir dae a bbeix: me nael me var, mexlur bbeixsael bbaexlabox hal mel maelmaerjia lei ciryoxr a me lalnga a mel, ca mel azo bbaex dae bbeixsael azo mex dae arsae noni teixl lei ddo? ⁸ Bir dae a bbeix: zaxlddaexr ggie baerlae mex su ddei qicurcurmo mex nr teixl lei arddeirnga a mel, zaxlddaexr su ca mel arsae yaa leil zaxlddaexr ssi nia a ae dae noni teixl lei ddo bbeixleir? ⁹ Nia lei eine nga, nia noni wo nr ddo ddar mel bbeix a mel, nia azo bbeix dae arseir saexl var bbeixleir? Nia dder baexr a bbeix dae lalnga a.

¹⁰ Middurbbor ddar hormo yoxr lei zza, ciryoxr-hanga lei yilsi zza. ¹¹ Ngo si bbeix dae ddar hal yoxr noni wo nr xie arddeirnga a mel, ngua dder cirmermi su nr nga. ¹² Nia lei eine nga. Nia Arbosobo ddei Xiu ddei bbesur gger dae hal mel yarzi sael li wo loxia a mel, nia dder Arbosobo leil qiuxr a, ho bei ho nia leil jiaxlhuixl leil hhel du lei lol var seirseir hal mel meixl gger lol nia.

¹³ Yel ca mel noni wo nr xie ddar hormo yoxr nei te su mel, yaa dder Arbosobo leil qiuxr a ddar eil mel azo yilsi a bbeix teixl lei xie lol nia.

¹⁴ Ngo ca mel noni wo nr xie ddar hormo yoxr nei te a Arbosobo dax ddar

biar a mel, ngo ddei xiu ddei yar dax biar dae arddeir a. Azo yilsi a mel ngo nr saexl. ¹⁵ Halmel, ngo arsae bei nia neil? Ngo ddei xiu ddei ca mel noni wo nr xie ddar sser a Arbosobo dax ddar biar nia, caxlgo caxl nia; ngo lei armael noni wo xie ddar hal mel sser a Arbosobo dax ddar biar nia, caxlgo caxl nia. ¹⁶ Nr nga a, nia ddei xiu ddei Arbosobo leil bbeix zae gger car, nia te dae ddar eil mel leil noni wo nr xie ca mel arsae nia dax cirgo a “Amae” bbeix cexr bbeixleir? ¹⁷ Nia ddar eil yox sser a Arbosobo leil nawo a mel yarzi seir, nael kebal ca mel dax seirggiebbær nr zza.

¹⁸ Ngo ca mel noni wo nr xie ddar hormo yoxr nei te a mel bir nia ca maelmaerjia leil lei te miur leixl, yel ngo Arbosobo leil nawo. ¹⁹ Nael jiaxlhuixl gga mel, ngo ca saexl dae ddar mel ngor qier te a ca leil mul gger zzorbbeixlei, bir ca mel noni wo nr xie ddar hal mel cirmeixr qier te leil lei seir leixl. ²⁰ Arzzi-nimar arzzi-nimo mel, nia azo lerler xiar a mel aniuksor sael a nga nr ddo, ca vaer sael a nga nia. Yarzi gexrddo hal mel bei ssi nr ddo hherdder aniuksor mel sael a nga nia.

²¹ Arbosobo ddei Lixlfaxr leil vaexr dae a, Seirpor bbeix:

“Ngo kebal cuxr ddei ddar sser dae,
kebal mermi ca mel ddei meir ngol dae a,
ngo ddei cassor-worssor mel dax ddar biar.

Eine nga bbeixarnar nael
yaa halae ngo ddei ddar nr no,”

eine bbeix a.^c

²² Eine nga a mel ca mel noni wo nr xie ddar hormo yoxr nei te a mel Arbosobo leil ddarzzi su ca mel leil i lol nr nga a nei, ddar-nr-zzi su ca mel leil i lol. Nael xiezi mel Arbosobo ddei ddar mel Arbosobo leil

^c14:21 Yirsaexlyal Sul 28:11-12 leil vaexr dae.

ddar-nr-zzi su ca mel leil biar gger nr nga, ddarzzi su ca mel leil biar gger arddeir a. ²³ Yel nia maelmaerjjia cirgo a jiaxlhuixl gga hher dae car, nia cirddeir-hanga lei ca mel noni wo nr xie ddar hormo yoxr nei te arddeirnga a, ddar eil mel leil noni wo nr xie bbeixsael Arbosobo leil ddar-nr-zzi su ca mel ddir lei arddeirnga a mel, yaa nia tae a nr bbeix arddollei? ²⁴ Nael nia cirddeir-hanga lei xiezi mel sael a Arbosobo ddei ddar mel ca leil biar gger, yel ddar-nr-zzi su ca bbeixsael eil mel leil nr saexl su ca mel ddir lei arddeirnga a, yar ddar eil mel leil noni ho a dder armael mel zuixl zza saexl var. Eine nga a mel Arbosobo ddei ddar yar leil ser sael a nga a. ²⁵ Yar noni dae car a, yar nixmox zzar kerzi dae mel ca mel saexl a. Yar dder qiaxrmeix ddei middur ddei leil puxr gex dae a Arbosobo leil zi a bbeix: “Arbosobo yarzi nia dax hher dax dae bbe,” eine bbeix var.

Jiaxlhuixl Gga Azo Lerler Bei A Lei Xilmeir-giedae Arddeir Zza Nia

²⁶ Arzzi-nimar arzzi-nimo mel, halmel, nia arsae bei nia neil? Nia cirgo a jiaxlhuixl gga hher dae car, ca cirddeirddeir a nael Arbosobo ddei caxlgo mel caxl, cirddeirddeir a nael ca leil mul gger, cirddeirddeir a nael Arbosobo yar leil azo lerler saexl lol a ca mel leil bbeix gger, cirddeirddeir a nael ca mel noni wo nr xie ddar hormo yoxr nei te, cirddeirddeir a nael ddar eil mel azo yilsi a ca mel leil bbeix gger. Azo bei zzorbbeixlei ca mel leil hhel du lei lol nia. ²⁷ Arseir ca mel noni wo nr xie ddar hormo yoxr nei te arddeirnga a, nrso ler leil lar te lol ddo. Cirddeir bbeix jjia ho a nael cirddeir bbeix. Halae kebal ca arddeir a nael yaa bbeix dae mel azo yilsi a biar teixl lei nia. ²⁸ Nael azo yilsi biar teixl lei su ca nr zza arddeirnga a mel, yaa dder jiaxlhuixl gga ca mel meixsaer qier leil bbeix teixl lei nr ddo. Yaa armael dax nei Arbosobo dax bbeix a dder ddo a.

²⁹ Arbosobo ddei ddar ca leil biar gger su xiezi mel lei nnel bbeixsael

soler zza a dder ddo a. Kebal ca mel zabbar seilseir a yaa bbeix dae mel hoxr bbeixsael nr hoxr xiar. ³⁰ Nael cirgo a cux dae ca mel gga Arbosobo arseir leil azo lerler saexl lol arddeirnga a mel, xilmeir ddar bbeix su ca hal ddei dder nor dae a, ca eil ddei leil bbeix lol nia. ³¹ Nia Arbosobo ddei ddar ca leil biar gger car, nia cirddeir biar teixl a cirddeir biar, yel ca maelmaerjia leil mul gger, yaa leil quex. ³²⁻³³ Arbosobo mel ca leil luaxl lol nr nga, zzi dax toltor a bei lol, yel Arbosobo ddei ddar ca leil biar gger su xiezi mel armael leil guaxr ssei xie. Hherdder jiaxlhuixl gga Arbosobo ddei cassor-worssor mel sael a nga.

³⁴ Ssormaer mel jiaxlhuixl gga hher dae a mel arjiuljjiu a hher dae lalddo, ddar te nr ddo. Yaa mel ddar no nia, hherdder Lixlfaxr gga vaexr dae mel sael a nga. ³⁵ Ssormaer mel jiaxlhuixl gga hher dae a ddar te a mel seixldaddo, yel yaa azo lerler zza niazzir arddeirnga a mel, ake hher dae a armael capor leil biex cexr.

³⁶ Arbosobo ddei ddar mel nia dax ddux lei a ngo? Holbbaexl nia leil lar saexl lol a ngo? ³⁷ Arseir zzir dae a armael xiezi a bbeixsael Arbosobo ddei Xiu ddei yar leil bbesur gger a, yar dder ngo nia leil vaexr gger dae eil mel hherdder Seirpor miardal dae mel nga a saexl nia. ³⁸ Arseir cexr-nr-ssexl arddeirnga a mel, yar leil guaxr nr ssa.

³⁹ Yel arzzi-nimar arzzi-nimo mel, nia Arbosobo ddei ddar mel ca leil biar gger ssi su bei meixr nia, ca mel noni wo nr xie ddar hormo yoxr nei te su mel leil lei nr te lol bei nr ddo. ⁴⁰ Azo lerler bei a lei barbar-verver arla xilmeir-giedae arddeir zza nia.

15

Zidu Gol Du Xixl Lei A

¹ Arzzi-nimar arzzi-nimo mel, nia holcir dae nia, halleix ngo nia leil biar gger Yisu leil biar dae ddar seirseir mel nia noni dil a vever a ddarzzi

dae a. ² Nia ddar seirseir eil mel leil velver a ddarzzi doxr dae arddeirnga a mel, nia leil jiuxl wo ho a. Nael nia kebal hal mel ddarzzi ssi arddeirnga a mel dder halleix nia Yisu ddei ddar seirseir mel baexr a ddarzzi a.

³ Ngo bbejjiur goxr zoxlyoxl zzir ddar seirseir mel ngo nia leil biar gger: hherdder Arbosobo Ddei Sul ber leil bbeix dae mel dax zox dae a Zidu mel niul ddei zuixl mel leil weix a si, ⁴ halae giexlhex, so ni cir ni yar gol du xixl lei a. ⁵ Halae Birdaexr^d leil mia lol, yoxl yar miardal dae ca ceinirmo leil mia lol. ⁶ Giedae ar boxl a yoxl arzzi-nimar arzzi-nimo ngorxiu ler nr ci leil mia lol. Eilleix ci a lei ca eil mel gga mel cir peix nr ci sael gol dae seir, kebal hal mel si ho a. ⁷ Giedae yoxl Yargel leil mia lol, halae yar miardal dae ca maelmaerjia leil zeixleixr ar boxl mia lol. ⁸ Maelele ci a ngo leil lei mia lol. Ngo mel nixixl nr ci seir dder xiu teixl lei aniux mel sael a nga.

⁹ Halleix ngo mel Arbosobo ddei jiaxlhuixl leil ke goxr bixr goxr a, yel Yisu miardal dae ca mel gga zoxl-nr-yoxl zzir ddei mel ngo nga a; ngo leil Yisu miardal dae ca lei bbeix nr piar. ¹⁰ Nael Arbosobo ngo leil seirseir meixl gger a, ngo dder eilleix ca eil ddei loxr a. Yar ngo leil seirseir meixl gger a mel baexr a meixl gger nr nga. Ngo miar bei a bir kebal Yisu miardal dae ca mel leil lei sulku leixl. Nael ngo armael bei dae nr nga a nei, Arbosobo ngo leil seirseir meixl gger ddei leil koxl dae a bei dae arddeir a. ¹¹ Yel ngo bbeixsael kebal Yisu miardal dae ca mel nga zzorbbeixlei, ngua Yisu ddei ddar seirseir mel biar, nia lei ddarzzi.

Ca Si Ho Mel Gol Du Xixl Lei

¹² Ngua nia leil Zidu si ho a yoxl gol du xixl lei ho a eine biar gger a mar! Nael arsaenga a nia ca mel gga halae bbeix: “ca si ho a yoxl gol du xixl

^d15:5 *Birdaexr* Xilaxl ddar bbeix “Jifar.” Birdaexr lei mel Jifar lei mi.

lei su nr zza” eine bbeix neil? ¹³ Ca si ho a gol du xixl lei su nr zza arddeirnga a mel, Zidu lei gol du nr xixl lei mar! ¹⁴ Zidu gol du nr xixl lei arddeirnga a mel, ngua biar dae mel lei baexr a biar dae lalnga, nia ddarzzi dae mel lei baexr a ddarzzi dae lalnga. ¹⁵⁻¹⁶ Ngua ca leil biar gger a bbeix Arbosobo mel Zidu si ho a yoxl yar leil gol du xixl lei lol a. Nael ca si ho mel gol du xixl lei su nr zza arddeirnga a, Arbosobo dder Zidu leil gol du nr xixl lei lol a; yel ngua Arbosobo bei dae mel biar a lei ca leil fur lalnga. ¹⁷ Zidu gol du nr xixl lei arddeirnga a mel, nia yar leil ddarzzi a lei baexr a ddarzzi dae lalnga, nia ddei zuixl mel halae ssoxr-nr-suxl seir. ¹⁸ Zidu leil ddarzzi su si ho ca mel lei cirse-cirsil Arbosobo dax bbe kae a. ¹⁹ Niul Zidu leil ddarzzi su ca mel gol dae car a lar goxr seir loxia arddeirnga a mel, niul mel bir kebal ca mel leil lei zoxlnixr ddo leixl.

²⁰ Nael yarzi bbeix, Zidu mel si a yoxl gol du xixl lei ho a. Yar mel si ho ca mel gga gol du xixl lei beil zzir ddei nga a. ^e ²¹ Ca mel si var eil ddei mel ca cirddeir dax a lei, yel ca mel si ho a yoxl gol du xixl lei eil ddei lei ca cirddeir dax a lei. ²² Yalda dax ddux lei ca maelmaerjgia lei si a; ^f nael Zidu leil koxl dae a ca maelmaerjgia lei gol du xixl lei nia. ^g ²³ Nael ca cirddeir-hanga lei arseir nael xilmeir, arseir nael giedae gol du xixl lei arddeir zza: gol du xixl lei beil zzir ddei mel Zidu nga a; arddolcar a yar jjixr lei halcar a nael, yar leil ddarzzi su mel gol du xixl lei nia.

²⁴ Eine nga ho a saelnei nixixl maelele ddei ci. Hane ci a mel, Zidu mel merlabbor middurbbor vaervaerpor bei su, quexrlixl zza su, bbesur zza su maelmaerjgia leil bei leixl gger a, merlabbor ddei goxr nei middurbbor

^e**15:20** *Yar mel si ho ca mel gga gol du xixl lei beil zzir ddei nga a Xilaxl ddar bbeix “saer mel gga mi beil zzir hal taex sael a nga.”*

^f**15:22** Cuaxlsixljil Sul 3 leil biar dae.

^g**15:22** Loxrmar Sul 5:12–6:14 leil biar dae.

ddei goxr lei Arbbor Arbosobo leil jia gger nia. ²⁵ Zidu mel zzirmar bei nia, yar yar leil vuxryixr su maelmaerjjia leil lei bei leixl gger a yar qihher woxrke jjiux ji dae hane zzezze ci. ²⁶ Yar maelele bei leixl gger ddei mel dder yar leil vuxryixr su, ca leil si lol var ddei nga a.

²⁷ Arbosobo Ddei Sul ber leil bbeix Arbosobo mel “cirza-hanga leil lei yar qihher woxrke hher dae lol a, yar ddei ddar no lol su ddei nga a,”^{h i} eine bbeix a. Arbosobo mel “cirza-hanga leil yar qihher woxrke hher dae lol a, yar ddei ddar no lol su ddei nga a,” bbaexl eine bbeix a mel Arbosobo leil bbeix nr dax dae.^j ²⁸ Arbosobo cirza-hanga leil Zidu ddei ddar no lol car, yar Ssor lei yar ddei ddar no nia. Yel Arbosobo cirza-hanga leil guaxr dae, cirza-hanga ddei zzirmar loxr a.

²⁹ Ca si ho mel gol du xixl lei nr var arddeirnga a, gol dae seir ca mel ca si ho mel leil weix a sexlsir a azo bei bbeixleir? Arsaenga a halae yaa leil sexlsir gger bbeixleir? ³⁰ Niul yoxl arsaenga a Zidu leil weix a arddolcar a lei olga lei nr li eine bei neil? ³¹ Arzzi-nimar arzzi-nimo mel, ngo nia meixsaer qier leil bbeix bel, ngo cirni-cirni olga lei pixl nrsulsul eine goxr dae. Ngo lei yarzi bbeix, nia mel dder ngo kuar ddu ddei nga a. Nia ngo dax cirgo a niul ddei Seirpor Yisu Zidu dax cir piar a bei a nga arddeir a.

³² Ca si ho mel gol du xixl lei nr var arddeirnga a, halleix ngo Yirfuxrsor zzi gga hher dae car, cinil sael a yarzi gexrddo ca hal mel dax zzi deil a mel, ngo dax azo seirggiebbær arddeir nr zza.

^h**15:27** *cirza-hanga leil lei yar qihher woxrke hher dae lol a* Ddar eil qier ddei yilsi mel dder Arbosobo Yisu leil cirza-hanga guaxr dae lol.

ⁱ**15:27** Sipi Sul 8:6 leil biar dae. Yar mel dder Yisu leil bbeix.

^j**15:27** *Arbosobo mel “cirza-hanga leil yar qihher woxrke hher dae lol a, yar ddei ddar no lol su ddei nga a,” bbaexl bbeix a mel Arbosobo leil bbeix nr dax dae.* Ddar eil qier ddei yilsi mel dder Yisu Arbosobo leil nr guaxr.

“Niul dder zzor doxr dda doxr lal ssa a.

Niul mel arggeni dder si du a.”^k

³³ Nia ca mel nia leil fur lol nr ddo: “ca nr seir mel dax gaxggor carbeix bei a mel, yaa nia leil nr seir loxr lol lei.” ³⁴ Nia ca si ho mel gol du xixl lei var ddarzzi nia, zeixleixr zuixl bei nr ddo. Nia ca mel gga mel halae Arbosobo leil nr saexl su armel zza seir. Ngo ddar eil qier bbeix a mel nia leil seixlda lol arddeir a.

Gol Du Xixl Lei Ho Ggecir Ddei Leil Biar

³⁵ Ca cirmemel a biex a bbeix: “Ca si ho mel arsae gol du xixl lei? Yaa ggecir arsae arddeir zza?” ³⁶ Eine biex su ca mel arsae eine medeil leir? Ni mi gga dae ji silmo mel nr si arddeirnga a mel dder zzae teixl lei nr var. ³⁷ Ni dae ji car a mel arddolcar a ner du lei var yarzzei hal zzei dae ji nr nga, so bbeixsael kebal loxlmoxr mel nga zzorbbeixlei silmo taex lar xiu ji. ³⁸ Nael Arbosobo armael xiar dae ddei dax zox dae a, yarsaer taex leil yar ddei yaxlzi ar ddei zza lol, cirza-hanga silmo mel lei armael ddei armael yaxlzi ar ddei zza. ³⁹ Ca mel nael ca ggecir ar yoxr, yirvu-nilhax nael yirvu-nilhax ggecir ar yoxr, ngax nael ngax ggecir ar yoxr, ngol nael ngol ggecir ar yoxr, ggecir maelmaerjjia lei zzi dax le-nr-sel.

⁴⁰ Merlabbor lei merlabbor ddei yaxlzi zza; middurbbor lei middurbbor ddei yaxlzi zza. Merlabbor gga igax zae dae mel nei middurbbor gga igax zae dae mel ciryoxr a nr nga. ⁴¹ Merni lei merni ar yoxr bbo, xiubbo lei xiubbo ar yoxr bbo, gie lei gie ar yoxr bbo, gie eil taex lei hal taex dax bbo le-nr-sel.

⁴² Ciryoxr a nga, ca si ho a, gol du xixl lei ddei lei eil mel lesel, giexlhex

^k**15:32** Yirsaexlyal Sul 2:13 leil vaexr dae.

dae ggecir ddei mel xiaxr var, arddolcar a gol du xixl lei ggecir ddei mel xiaxr nr var. ⁴³ Giexlhex dae ggecir ddei mel seixl zzae seixldaddo; naexl zzae naexlbix, gol du xixl lei ggecir ddei mel mi zzae middux, sexr zzae sexr. ⁴⁴ Giexlhex dae ggecir ddei mel middurbbor ddei ggecir nga; gol du xixl lei ggecir ddei mel merlabbor ddei ggecir nga.

Middurbbor lei ggecir arddeir zza a mel, merlabbor lei ggecir arddeir zza. ⁴⁵ Arbosobo Ddei Sul ber leil bbeix: “Ca bei beil zzir Yalda ddei mel gol dae ca arddeir loxr a,”^l maelele Yalda hherdder Yisu Zidu nael olga gger su xiu ddei loxr a. ⁴⁶ Nael middurbbor ddei ggecir hal ddei zza ho a saelnei merlabbor ddei ggecir hal ddei zza. ⁴⁷ Ca bei beil zzir Yalda ddei mel middurbbor nilhar mel sser a bei teixl lei, giedae Yalda hherdder Yisu Zidu nael merlabbor lei. ⁴⁸ Middurbbor ca mel mel Yalda lesel, merlabbor ca mel mel Yisu Zidu lesel. ⁴⁹ Yel eilleix nael niul middurbbor ddei ca lesel, arddolcar a nael merlabbor ddei ca lesel.

⁵⁰ Arzzi-nimar arzzi-nimo mel, ngo nia leil bbeix gger, sirnilni zza nei hoxrneixr niar dae ggecir ddei mel Arbosobo ddei goxr gga ddir wo nr ddo, xiaxr var ggecir ddei mel xiaxr nr var hal mel li wo nr ddo. ⁵¹⁻⁵² Ngo nia leil halleix ca mel nr saexl arddeir bbeix gger nia: baerlae maelele halboxl mex du lei a, neixleixr sael, meixcix sael dder, Yisu leil ddarzzi su si ho ca mel mel gol du xixl lei a, merlabbor ddei ggecir li wo a, zeixleixr lei xiaxr nr var a. Niul Yisu leil ddarzzi su ca cirmelmel a nr si, nael niul maelmaerjia lei gierbox a merlabbor ddei ggecir li wo nia.

⁵³ Xiaxr var ggecir mel arsaebeilei xiaxr nr var loxr nia, si var ggecir mel arsaebeilei si nr var loxr nia. ⁵⁴ Hane ci a mel Arbosobo Ddei Sul ber leil bbeix dae ddar mel yarzi loxr a. Sul ber leil bbeix: “Cirza-hanga leil si lol ddei leil mel bei leixl gger ho a,”^m eine bbeix a. Yoxl bbeix

^l**15:45** Cuaxlsixljil Sul 2:7 leil vaexr dae.

^m**15:54** Yirsaexlyal 25:8 leil vaexr dae.

⁵⁵ Ca leil si lol su,
ni ca leil bei leixl gger quexrlixl ddei arddolmaex zza dae?
Ca leil si lol su,
ni ca leil doxllabox alcur baex arddolmaex niar dae?ⁿ

eine bbeix a.

⁵⁶ Ca mel zuixl bei a mel si nia. Lixlfaxr dax zox dae a ca mel leil zuixl dixl gger nia. ⁵⁷ Arbosobo mel niul leil niul ddei Seirpor Yisu Zidu leil koxl dae a zuixl ddei leil bei leixl lol a. Yel yar leil nawo a.

⁵⁸ Yel ngo perniar dae arzzi-nimar arzzi-nimo mel, nia velver a hhel gex doxr dae a, Yisu leil ddarzzi zei si nia. Nia lei saexl, nia Seirpor leil weix a, yarzi sulku bei dae miar hal mel mel baexr a bei nr nga, yel nia arddolcar lei zabbar seilseir a Seirpor ddei miar bei nia.

16

Arbosobo Ddei Cassor-Worssor Mel Leil Beijjiu

¹ Arbosobo ddei cassor-worssor mel leil zzirbae gger a yaa leil Beijjiu eil ddei leil bbeix ci a mel, halleix ngo Jialataexl mermi jiaxlhuixl mel leil arsae miardal mel, nia lei arsae bei nia. ² Xiqiti cir ni ci a mel nia armael zzirbae bei wo ddei dax zox dae a hormo vei ddu zza mel vei teixl lei zaxr dae nia. Nr nga a nia halae ngo lei ho a sael zzirbae dux. ³ Ngo lei car a, nia arseir leil ssi lol mel, ngo xil ar fo vaexr a yaa leil vei dae lol a,^o yaa leil nia ddei zzirbae mel Yiluxlsaler zzi gga ho mal gger lol. ⁴ Ngo

ⁿ15:55 Hexrxi'a Sul 13:14 leil vaexr dae.

^o16:3 ngo xil ar fo vaexr a yaa leil vei dae lol a Barloxr Yiluxlsaler zzi gga jiaxlhuixl leil xil vaexr gger a yaa leil bbeix gger: zzirbae ho mal gger

lei ssi dax nia arddeirnga a nael, yaa ngo dax cirter a ssi cexr.

Azo Lerler Bei Nia

⁵ Ngo mel Marcixrduixl mermi ssi gel niazzir dae. Ngo halmaex ssi ho a dder nia dax ssi.^p ⁶ Ngo nia dax argielggur hher piar a; zzix zi ddei lei nia dax cirgo a goxr piar a. Eine nga a mel ngo arddolmaex ssi zzorbbeixlei, nia ngo leil ho cexr. ⁷ Eilboxl ngo nia leil arleixr i lei lalnga eine bei nia-nr-zzir. Seirpor ngo leil ddarkoxl arddeirnga a, ngo nia dax argielggur hher niazzir. ⁸ Nael ngo Yirfuxrsor zzi gga hher dae a Wurxuexr jiax^q ci zzezze hher ci nia. ⁹ Ngo eilmaex hher dae a ngo leil dir su ca cirke zza bbeixarnar, nael ngo halae miar seirseir cirsax bei cexr.

¹⁰ Tixrmoxrtaexl nia dax halmaex lei arddeirnga a, nia yar leil zabbar seilseir a beijjiu a yar leil nixmox dder vaer nia; yar lei ngo sael a Seirpor ddei miar bei. ¹¹ Arseir lei yar leil i zei nr ddo. Yar miar mel bei jjia ho a, nia yar leil ho a, zzasoso arla ngo dax jjixr lei lol nia. Ngo yar leil nei kebal arzzi-nimar mel leil xia dae.

¹² Niul ddei arzzi-nimar Yalboloxr leil bbeix ci a nael, ngo yar leil niul ddei arzzi-nimar mel dax cirgo a nia leil i ssi hormo boxl nei quex a; nael

lei su ca eil mel Gelixrdo jiaxlhuixl gga lei.

^p**16:5** Barloxr yaa leil xil vaexr gger car, halae Yirfuxrsor mermi hher dae seir. Yar Wurxuexr jiax goxr ho a saelnei Marcixrduixl mermi ssi.

^q**16:8** *Wurxuexr jiax* Yoxrtaexl su ca mel bbecir-bbekoxl jiax eil ddei goxr. Arbosobo yaa leil loxlmoxr gger a, yaa Arbosobo leil nawo. Lixlweixljil Sul 23:15-21 leil biar dae. Halae yoxl Yisu gol du xixl lei ho hal cir ni goxr ho a ngorcei ni loxr a mel dder Wurxuexr jiax. Hal cir ni Arbosobo yar ddei Xiu ddei jiaxlhuixl leil gger. Sirtuxrxixrzuaxl Sul 2 leil biar dae.

eilcar yar ssi nia-nr-zzir, arddolcar a ssi nixixl zza a yar ssi var seir.

¹³ Nia fadae nia, Arbosobo leil vever a ddarzzi doxr dae nia, nixmox vaervaermo bei nia, hhel du lei nia. ¹⁴ Azo bei lei ca leil perniar a bei ssi nia.

¹⁵ Nia lei saexl, Sitixrfaxr hhexr mel Yalgieyal mermi Seirpor leil ddarzzi beil su hhexr nga a; yaa cirhhexr-lorbba lei Arbosobo ddei cassor-worssor mel leil visser. Arzzi-nimar arzzi-nimo mel ngo nia leil quex, ¹⁶ nia ca eil mel ddei ddar no nia, halae yaa dax cirgo a Arbosobo ddei miar bei a yarzi sulku ca hal mel ddei ddar lei no nia. ¹⁷ Sitixrfaxr nei Fuxrtuxrnaxrdu halae Yalgiegur yaa ngo dax eilmaex lei a, ngo yarzi ggese. Nia ngo leil malmal beijjiu nr cexr hal mel yaa ngo leil beijjiu a.

¹⁸ Yaa niul leil nixmox^s zzaso lol. Nia yaa leil yarzi sael i du nia.

Zzasoso Dae Biex Nei Ca Leil Quex

¹⁹ Yalxilyal mermi jiaxlhuixl gga ca mel lei nia leil zzasoso dae biex. Yaljula nei Baerzila, halae yaa ake jiaxlhuixl gga ca mel Seirpor leil koxl dae a, nia leil zzasoso dae biex doxr. ²⁰ Eilmaex gga hher dae arzzi-nimar arzzi-nimo maelmaerjjia lei nia leil zzasoso dae biex. Nia lei zzicarzzi leil zzasoso dae biex nia ngor.^t

²¹ Ngo mel Barloxr a. “Nia leil zzasoso dae biex” ddar eil qier mel ngo armael vaexr a.

²² Arseir Seirpor leil per-nr-niar arddeirnga a, yar zoxr a! Seirpor, ni nialngasael lei lar!

²³ Seirpor Yisu nia leil cirza-hanga seirseir meixl gger lol nia.

²⁴ Ngo Yisu Zidu leil koxl dae a nia ca maelmaerjjia leil perniar! Amae.

^s**16:18** *nixmox* Xilaxl ddar bbeix “xiu.”

^t**16:20** Halcar a Yisu leil ddarzzi su ca mel zabbar seirseir a zzasoso dae biex a mel yaa qiaxrmeix ddei leil jiuxl.